

ალექსანდე ზრონელი.

მთის არწივი უამილი



ტ ვ ი ლ ი ს ი
1914 წ.

ჟურნალ „ქლიხ“ გამოცემა.

ფსევდონიმია შესანიშნავი მოქალაქისა. ისტორიკოსისა, პუბლიცისტისა და საზოგადო მოღვაწის ალექსანდრე თევდორეს პე ყიფჩიისა (1862-1916). მათი საგვარეულო სოფელ სალილაშენი აღინარა ფრონეს პირზეა გაშენებული, სწორედ აქედან აიღო ალექსანდრემ თავის ფსევდონიმად — ფრონელი. მისი უფროსი ძმა იყო გრიგოლ ყიფშიძე. ილია ჭავჭავაძის თანამშრომელი და „ივერიის“ საქმეთა გამგებელი და შემდეგ მისი რედაქტორიც. ძმათა ყუფშიძეთა მამა მღვდლად მსახურობდა სოფელ წვერში (მაშინ გორის მაზრა). სადაც 1862 წლის იანვარში დაიბადა ვაჟი, რომელსაც სახელად უწოდეს ალექსანდრე. მისი პირველი სასწავლებელი იყო გორის სასულიერო სკოლა. საიდანაც გადავიდა თბილისის სასულიერო სემინარიაში. დაამთავრა კი ვიმანია. რის შემდეგაც სარკოვის უნივერსიტეტის ისტორიულ-ფილოლოგიურ ფაკულტეტზე ისწავლა.

სამშრომლოში დატრუნებულს მას უნდოდა მასწავლებლობა თბილისის როსკლიმე სასწავლებელში. მაგრამ მაშინ მიღებული წესის მიხედვით, მას როგორც ქართველს, სახალხო განათლების მზრუნველმა („პოეტიკელმა“) ვერ მოუძებნა აქ მასწავლებლის ადგილი. რისთვისაც ალექსანდრე იძულებული იყო ემსახურა სხვადასხვა დაწესებულებაში (საგუბერნიო სამმართველოს მდივნად, საგლეხო სარტებულოს მდივნად, მომრიგებელ შუამავლად ახალციხეში, საგუბერნიო სამმართველოს მრჩეველად, ქუთაისის გუბერნატორის თანაშემწედ, თბილისის გუბერნიის თავადაზნაურთა დეპუტატთა საკრებულოს მიწათმოქმედებისა და მოწყობის კომისიის მდივნად). სამოსელეო სამსახურს ბევრი დრო მიჰქონდა. მაგრამ საზოგადოებრივ მოღვაწეობას, პრესაში მონაწილეობას, ორგანიზატორულ და პრაქტიკულ მუშაობას ქართულ ჟურნალ-გაზეთებში („ივერია“, „ელდე“, „საქართველო“) მაინც ახერხებდა. წერდა ისტორიულ მიმოხილვებს, სწავლობდა და აქვეყნებდა წერილებს საქართველოს ქალაქების ეკონომიურ მდგომარეობაზე, სოციალურ უკუღმართობათა შესახებ საქართველოში, აქტიური თანამშრომელი იყო „ივერიისა“ დაწყებული 90-იანი წლებიდან. მისი მრავალ საგაზეთო წერილის მიზანი იყო დაცვა ქართული მიწა-წყლისა, რათა იგი არ გადასულიყო არაქართველთა მფლობელობაში. დაცვა იმ ქართული მოსახლეობისა, რომელიც ისტორიულ უკუღმართობათა გამო სხვა სარწმუნოების გავლენაში იყო მოქცეული (ქართველი მაჰმადიანები, ქართველი გრიგორიანები...), წერდა თურქ-ოსმალთაგან მიტაცებულ საქართველოს პროვინციების მოსახლეობის ეროვნულ და ეკონომიურ მდგომარეობაზე.

ალექსანდრე ყიფშიძე-ფრონელი ქეშმარიტი პატრიოტი იყო, ილია ჭავჭავაძის საქმიანობის ერთგული გამაგრებელი და გამგრძელებელი, ქართველი ეროვნული მოღვაწე.

მის მრავალრიცხოვან ნაწერთა შორის ყურადღებას იქცევს დიდი თუ მცირე კორესპონდენციები საქართველოს უახლესი ისტორიის დარგიდან. მისი დაკვირვებისა და ანალიზის მასალა იყო საქართველოს პოლიტიკური დაახლოვება და ურთიერთობა რუსეთთან, ამ უკანასკნელის წარმომადგენელთა მუშაობის მიზანო და სტილი საქართველოში 1801 წლის შემდეგ. ქართული სამეფო საგვარეულოს წევრთა ბედი და ყოფა-ცხოვრება XIX საუკუნის დასაწყისში. ქართული მოსახლეობის ვითარება რუსთაგან ანექსიის დაწყების წლებში. ალექსანდრე ყიფშიძე თავისი გამოკვლევებისათვის იყენებდა ოფიციალურ საბუთებს. საარქივო და სტატისტიკურ ცნობებს. ჭავჭავაძისა და იმერეთში (ახალციხესა და ქუთაისში) სამსახურისას სწავლობდა იმ საბუთებს. რომელთაც ეყრდნობოდა თავის ისტორიულ მიმოხილვებში. მისი ნაშრომები „მთიულეთი 1804 წელს“. „კახეთის ამბობება 1812 წელს“. „ღიდებული მესხეთი“ და მათ შორის „მთის არწივი შამილი“ ეყრდნობა ოფიციალურ საბუთებს. გადმოცემებს. ხალხის ხსოვნას.

ალექსანდრე ყიფშიძე-ფრონელი გარდაიცვალა 54 წლისა. დასაფლავებულია დიდუბის ქართველ მოღვაწეთა პანთეონში.

ალექსანდრე შირიანაშვილი, აგრეთვე ქართველი საზოგადო მოღვაწე და ახლოს მცნობი ფრონელისა. წერდა: „დასაფლავების დროს ბევრი გრძნობიერი სიტყვა წარმოითქვა ალექსანდრეს საქებად და სადიდებლად. ყველა სიტყვის დედა-აზრი ის იყო. რომ განსვენებულის სასელი ამიერიდან ჩაიწერება წარჩინებულ და სამშობლო ქვეყნისათვის თავდადებულ პირთა სიაში და იქნება დაუვიწყარი“ („ნაკადული“, № 6, 1916 წ.).

ალექსანდრე ყიფშიძე-ფრონელის საქმენი და ღვაწლი. მიძღვნილი მშობლიური ერისა და ქვეყნის სასიკეთოდ და სასიყვარულოდ. მარტლაც არ შეიძლება დავიწყებას მიეცეს!

ხოლომონ ხუციშვილი



ალექსანდრე ბატონიშვილი.

მთის არწივი შამილი.

(ისტორიული ამბავი).

25 მარამობისთვის, ზაფხულის მიწურულეებში (1909 წ.), ტფილისში დაბანაკებულ რუსის მხედრობამ ფრიადის ვაშლინებით იდღესასწაულა ორმოცდა ათის წლის თავი ვუნების აღებისა და შამილის დატყვევებისა. პარაკლისის გადახდით და სამხედრო მხიარულობით კავკასიის ძღვევა-მოსილმა ჯარმა განაახლა თვის ხსოვნა-ვონებაში მისთვის ის ნეტარ-ხსენებელი დღე, ოდეს თვის წინაშე მოახრე-ვინა ქედი ფოლადის გულის კაცს, სახელოვან მთის არ-წივს იმამ შამილს, იმ შამილს, რომელსაც მამულის-შვილობაში მთელ მეცხრამეტე საუკუნოს ჩვენში სწორი და ბადალი არა ჰყოლია.

დღევანდელი ცხოვრება-ვითარება სადღესასწაულოს არას წარმოადგენს. გული მკვდარია ცხოვრების სიავით, ხოლო სული წამებული და ტანჯული. თუ გამარჯვე-ბულს და გაბატონებულს სამხიარულო არა მოეპოვება რა, დაჩაგრულს და პატივ-ახდილს სწორედ თავი აქვს ჩასაქოლი ეამთა-ვითარების სიდუხჭირისაგან. მიუხედავად ამისა ჩვენი დედა ქალაქი მაინც აჰყვა ჯარის ფეხის ხმას. საღამოს პირზე ტფილისელობა მრავლად მოეფინა მიხე-ილისა და გოლოვინის პროსპექტებს, სტკებოდა საუც-ხოვო განათებით და პირმცინარი და მხიარული მიიწევ-და სახაზინო თეატრისაკენ, რომლის კედლებზე გამოე-

ფინათ სურათი მთავარ-სირდალ თ. ა. ი. ბარიათინსკისა და ფრთა-მოტეხილ, დაღონებულ და დაძმარებულ შამილისა.

I

შაჟილის დატყვევება.

განა და რა მოხდა ისეთი ამ ორმოცდა ათის წლის წინად, რომ რუსის მხედრობამ საჭიროდ ჩასთვალა ედღესასწაულნა გამოჩინებით. შედლოუხითა და ზემით, ამ ამბის ორმოცდა ათის წლის თავი?

მეცხრამეტე საუკუნის დასაწყისს საქართველოს ისტორიამ პირი იბრუნა. პოლიტიკურად გასაძლიერებლად და მოსალონიერებლად ჩვენმა წინაპრებმა მოიპატიოეს ჩრდილოეთიდან რუსები. მათის აქ მოსვლით ქართველ მეფეთ და სამღვდლოებს ენებათ შინ გლახად წარმოებული საქმე გამოეტრიალებინათ, განმტკიცებულიყვნენ ძალ-ღონით და ევლოთ ისტორიის სარბიელზე ძველებურად, ესე იგი დამოუკიდებლად, ვითარცა კუუა-გონება გაუქრიდათ. მოლოდინი არ გამართლდა და ბედის ჩარხი უკულმა დატრიალდა.

რუსის მხედრობა მკვიდრად დაბინავდა საქართველოში. ვინც-კი ხმა ამოიღო, თავი გაუგალეს, ან ციმბირის გზა ატკეპნიეს, და ბოლოს ამავე ქართველების შემწეობა-დახმარებით მთელი ამიერ-კავკასია დაიმორჩილეს მოკიდებული შავი ზღვიდან კასპიის ზღვამდე და დარიალის კარიდან მდინარე არეზამდე. მხოლოდ კავკასიის მთა დიდ ხანს არ იხრიდა ქედს. მედგრად გადაელობა წინ ბუმბერაზ ქვეყანას ერთი მუქა მთიელობა და მთელი ნახკვარი საუკუნე კოკის პირულად ჰღვრიდა სისხლს, ოლონდ-კი შეენარჩუნებინა დამოუკიდებლობა, თავისუფლება და ძველებური სილაღე. ნელ-ნელა იცლებოდა სისხლისაგან ურჩი და ჯიუტი მთა, წელში გასწყდა არისტოკრატიული ტომი ყაბარდოსი, შიმშილის პირზე მიდგა საჩაჩნო, საჩერქეზო ოსმალეთს გადახვეწა, ხოლო ავარიამაც თითი მოიგრიხა. ოცდა ათი წელიწადი იბრძოდა საოცარის მხნეობით შამილი, იმამი საჩაჩ-

ნოსი და ავარიისა, ანუ დაღესტნისა, ერთხელ გულიც გაუგმირა რუსის ხიშტმა, ძუძუში დაკრულმა პირი ბეჭებში გაატარა, მაგრამ ბევრჯელ დამარცხებული ხელახლა იკრებდა ძალ-ღონეს და ახალის მხნეობით ეკვეთებოდა რუსებს. ბევრი შავი ღლე აჩვენა შამილმა რუსის მხედრობას, ბევრს ვაჟ-კაცს აუტირა ცოლ-შვილი და ღედ-მამა. ბევრჯელ ასობით და ათასობით ამოუყლენთნია რუსის ჯარის-კაცნი და ერთხელ თვით მთავარ-სარდალი რუსის მხედრობისა თავადი ვორონცოვი ცოტას გაწყდა კინალამ ტყვედ არ წაიყვანა.

მეტის-მეტად სძულდა შამილს რუსობა, ისე არ ახსენებდა ამ ქრისტიანე ერის სახელს, რომ ზედ არ დაეყოლებინა „ღონღუზი“. უპირო და გაუტანელიაო, ამბობდა შამილი რუსებზე, კაცი ვერ ენდობა მაგათაო. მოგატყუებს, გიღალატებს და პირში ჩალა-გამოვლებულს დაგტოვებსო. ამისათვის შამილმა აუტეხა რუსებს ბრძოლა ულმობელი და სასტიკი. ასეთი ომი ღვთის მოსაწონი საქმეაო, ამბობდა შამილი. რუსის ბელით მოკლული მართლ-მორწმუნე მოსლემინი პირდაპირ სამოთხეში შევაო, ჰფიქრობდა და ჰქადაგებდა შამილი. რადგან ამაზე დიდ ჯილდოს ადამიანი ვერც-კი წარმოიდგენს, მაშასადამე ღლენი თვისი მოსლემინმა რუსებთან ბრძოლაში უნდა დალიოსო, რომ მით მოიპოვოს სასუფეველი და გახდეს ღირსი სამოთხის ნეტარებისაო. აი სწორედ ამ დაუძინებელ მტერს შემოართყა რუსის მხედრობამ ალყა გარს გუნების კლდეზე 25 მარიაშობისთვეს 1859 წელს. მთავარ სარდალ თ. ა. ი. ბარიათინსკიმ ბრძანება გასცა —ათას თუმანს ვაჩუქებ ჯილდოს, ვინც შამილს ცოცხალს მომგვრისო. რაღა თქმა უნდა, რომ აკუწულ-აჩეხილი შამილი, ან ხიშტით განგმირული სამხედრო ტროფეად არ გამოდგებოდა. ტყვე შამილი პეტერბურგში ისეთსავე ეფექტს მოახდენდა, როგორც ძველ რომში აზიის სხვა და სხვა მეფენი ტრიუმფატორთა ეტლზე მიბმულნი.

შამილი კარგად ჰხედავდა კარზე მომდგარ უბედურობას, ხედავდა იმასაც, რომ მისი ბედის ვარსკვლავი მჩსწყდა, ციცაბო და სალი კლდენი ველარ დაიფარავდნენ მთის თავისუფლებას. სამღეთო და წმინდა ომში გასწყდა და გაიელიტა საჩაჩნოს და ავარიის ვაჟკაცობა. სადღაა ლომ-გმირნი, წინად რომ მხარს უმშვენებდნენ. აგერ სულ რაღაც 400 მიურიდმა შეაფარა მასთან ერთად თავი უკანასკნელ საევანეს — გუნიბს. რას გახდებოდა ეს ერთი მუჟა თავდადებულ გმირთა ბარიათინსკის აუარებელ ჯართან!

რკინის სალტასავით შემოერტყა რუსის მხედრობა გუნიბსა და ქიანქველასავით მიცოცამდა ციცაბო კლდეებზე თოკის კიბეებით. გაბრაზებული რუსის მხედრობა დიდის ხნის განუწყვეტელი ომით მარტო და ნიშანს — ზარბაზნის სროლას ელოდა, რომ შევარდნილიყო გამაგრებულ გუნიბში და აეკლო უბედური სოფელი, ეს უკანასკნელი ბუდე და საევანე ზვიად არწივისა. შამილმა იცოდა, რომ დანდობით აღარავინ დაინდობდა.

ვინ მიხვდება, თუ რას ჰფიქრობდა კიდევ იმამი საჩაჩნოსი და ავარიისა!

აქ, გუნიბში, რომ დრამის უკანასკნელი მოქმედება იშლებოდა, გუნიბის გარედ, დიდ ქვაზედ დაბრძანებულიყო, არყნარის ჭალაკში, თვით თავადი ა. ი. ბარიათინსკი. გარს ეხვია ბრწყინვალე ამალა და მოუთმენლად ელოდნენ როგორც სარდალი, აგრედვე ამალა, თუ რას იტყოდა გალიაში მომწყვდეული ლომი, ნებაყოფლობით გამოვიდოდა სიმაგრიდან, თუ ისევე-ისე საჭირო შეიქმნებოდა იერიში და ათასობით კვლავ გაწყვეტა რუსის მხედრობისა.

ცეცხლის გეენას რომ განიცდიდა შამილი და თავადი ბარიათინსკი კიდევ გულის ძგერით რომ ელოდა, აბა როდის მომივა ამბავი — იმამი მზადაა თავი დაგიკრასო, ამ ისტორიულ ეამს ასიოდე მიურიდი ტყიან გორაკს ამოჰფარებოდა გუნიბის სიახლოვეს და იყო ასე მიყუყული. დაინახეს თუ არა მიმალულებმა რუსის

მხედრობა, გულმა ველარ მოუთმინა და ძტერს სეტყვა-სავით დააყარეს ტყვია-წამალი. ცოცხალი მაინც ხომ ვერ გადურჩებით მზის გულზე მოელვარე ხიშტების ტყესაო, ალბად იფიქრეს სასიკვდილოდ თავგამეტებულ ვაჟკაცებმა, იშიშვლეს ხმალ-ხანჯალი და დაერივნენ გაბორბტებულ მტერსა. რალა გამოცანაა საჭირო, რომ თვალის დახამამების უმაღლ, გაიჟლიტებოდა ეს ერთი მუქა მიურილობა. ცოცხალი ერთი მიურიდიც არ გადაარჩენილა ამ საოცარ და უმაგალითო ხელ-ჩართულსა.

ამის მნახველ. შამილს რილას იმედი უნდა ჰქონოდა. მის თვალთა წინაშე სანთელსავით დნებოდა მისი ერთგული და მოამაგე გუნდი მიურიდებისა, უკანასკნელი იმედი და სასოება როგორც იმამისა, აგრედვე დაღესტნის თავისუფლებისა.

არწივი იმის არწივია, რომ შორს მკვრეტელია. ნათლად ხედავდა ბებერი არწივი, რომ ხსნა ერთად ერთი და იყო, სრული დამორჩილება, წელში მოხრა და თავის დაკვრა, მაგრამ ის ფიქრი, რომ რუსებს თავი უნდა დავუკრაო, გულს უმღვრევდა შამილს, სულს უშფოთებდა და ელეთ-მელეთსა ჰგვრიდა.

ამაყი მთის ბატონი, იმამი სრულიად დაღესტნისა, ეტყობოდა, რომ ვერ ითვისებდა ამ დამამცირებელ აზრსა. მისი ზვიადი ბუნება ვერ ურიგდებოდა მონობას და ტყვეობას, რასაც ადვილად იტანს მხოლოდ ლაჩარი და სულ მდაბალი და იყო ასეთს ცეცხლის ალში გახვეული.

თავად ბარიათინსკის მოთმინებასაც ბოლო ეღებოდა. — მოსაფიქრებლად საათის ერთს ჩარექს გინიშნავო, შეუთვალა შამილს, ან დამმორჩილდი, ან. არა და გაგანადგურებო.

ერთი ვაი-ვაგლახი შეუდგათ გუნების სიმაგრეში, თ. ბარიათინსკის მუქარას რომ მოჰკრეს ყური. შამილის ჯალაბის და ციხეში გამომწყვდეულ დედა-კაცთა წივილ-კივილისაგან ყურთა სმენა აღარ იყო. თმა გაწეწილნი და გონება დაბნეულნი ფეხებში ჩაუცვივნენ

სალს კლდესავით გაქვავებულს იმამს, უკოცნიდნენ კალთებსა და მუხლებს და ემუდარებოდნენ, რომ დამორჩილებოდა რუსებს და პასუხი გაეგზავნა თ. ბარიათინსკისთვის—იყავნ ნება თქვენი, გმორჩილდებიო.

იმ სულის კვეთებას, რასაც განიცდიდა იმამი დიდესტნისა ამ ჟამად, იმ დამწველსა და დამდაგველს ცეცხლს, რომლის ალი სწავდა შამილს, უმწუო დედა-კაცთა და ბავშვების კვნესა-ტირილს და ვაებას რომ ისმენდა, ვინ ასწერს თუ არ ზეცხებული ღვთიურის მადლით პოეტი! გატყდა შამილი და აღარ იცოდა, როგორ მოქცეულიყო და რა მოექმედნა. დამორჩილდე და ხომ სამუდამოდ შევირცხვინე თავიო. განა რას იტყვის მართლ-მორწმუნე შოსლეშინი, როცა გაიგებს, რომ იმამი დიდესტნისა, ზეცით კურთხეული და მოადგილე დიდის მაჰმადისა ცოცხალი დანებდა „დონლუზებს“ და არ შეაკლა თავი, როგორც განწირულმა ზვარაკმაო. თუ ერთი კიდევ ვსცადო ბედი და შევებრძოლო მტერს ძველებურად — ჩემებურად, ავარულად და ჩაჩნურადო. განა ეს პირველი შემთხვევაა ასეთის გაპირვებისა, განა ასჯერ და ათასჯერ წინადაც არა ვყოფილვარ გაპირებაში, მაგრამ ბედს არ ვაუწირივარ. ნუ თუ დღეს დასასრულია ყველაფრისა? მაგრამ, ვსცადო და რაღა პასუხი გავსცე უმწუო დედა-კაცებს და ქულფათობას. მე კიდევ რომ გადავჩე ტყვეობას და მტერს ხელიდან გამოვუსხლტე, გუნიბს რაღა ეშველება, ხომ ძირიან-ფესვიანად ნაღმით დაანგრევენ სოფელს და გაქლეტენ ყველას, ვინა-ც-კი მოასწრებენ.

ქართველები რუსებს გვერდში ამოუდგნენ და მხურვალე მონაწილეობა მიიღეს რუსებთან ერთად შამილთან ბრძოლაში. მაშინ იძულებით არ გაჰყავდათ ჯარისკაცებად ქართველები, თავადი და გლეხი თვისის ნებაყოფლობით მიისწრაფოდა ჯარში, ზოგი საომრად და სავაჟაკოდ, ზოგი კიდევ ჩინისა და წარჩინებისათვის.

„თუკლთა მილიცია,“ ცხენოსანი თუ ქვეითი, საოცარ გიბროცას და ვაჟაკობას იჩენ და და თვით შამილს არა

ერთხელ უთქვამს თურმე, რუსები რომ მუსრს გვავლებენ მთიულებს, ეს მესმის და მეყურება, ვინაიდან ზღაპრულ მგელსავით ხახაში ძვალსავით გავეჩხირეთო, მაგრამ ამ ქართველებს რაღა უნდათ ჩემგან, რად ეხმარებიან რუსებს ასე ერთგულად და რად უჩვენებენ ასე გაბედულად და ოსტატურად მთის გზა-კვალსაო. განა ჩემისა და დაღესტნის წახდენით მაგათ რა შეემატებათ, ან თუ ჰგონიათ, რომ დაღესტნის დამონება დაუბრუნებს მაგათ გამქრალ პოლიტიკურ არსებობასო. ისე ჩავიდა საფლავს იმამი, რომ ვერ შეიტყო მიზეზი ამ გულსაკლავ საიდუმლოსი და ვერც გაიგებდა, ძლიერაც რომ სცდილიყო მის გაგებას. ეხლა რომ არა ვართ უხვად დაჯილდოვებულნი პოლიტიკურის გულთამხილაობით, აბა, ამ ორმოცდა ათის და სამოცის წლების წინად ნასახადაც სად მოიპოვებოდა პოლიტიკის სიღრმე-სიგანეში ჩახედული კაცი.

1854 წ. თიბათვის გასულს შამილის მიურიდები იმამის შთაგონებით და ბრძანებით დაეცნენ კახეთს. შილდელები გენერალ თ. დავით ქავკავაძის უფროსობით მხნედ დახვდნენ ლეკებს და უკუ აქციეს თავდამსხმელნი, მაგრამ შილდის მეციხოვნეთ ის ველარ მოახერხეს, რომ ს. წინანდალი გადაერჩინათ აკლება-აოხრებისაგან. აკლებას ვიღა ჩიოდა, დიდი სირცხვილი და თავის მოჭრა ის იყო, რომ ტყვედ წაიყვანეს გრიბოედოვის ცოლის ძმის გენერალ დავით ქავკავაძის ცოლშვილი და ნათესავნი, სტუმრად ამ დროს იქ დამსწრენი, და ვიდრე იმპერატორმა ალექსანდრე II დიდი ფული არ გაუგზავნა ტყვეების დასახსნელად, შამილმა არ გაანთავისუფლა იგინი. ეს ტრალიკული ეპიზოდი მრავალ-კარიან რუსების ომისა დაღესტანთან ცოცხლად აქვს დასურათებული ფრანგის ქალის *არანსიუს*, რომელმაც ქავკავაძიანთ და ორბელიანთ ქალებთან ერთად იგემა ლეკური ტყვეობა და ლეკურივე ხინკალი. *)

*) გენერალი თ. დავით ქავკავაძე, ნინო გრიბოედოვის ძმა,

ისტორიული ნესტარი რომ დავკრათ ლეკთაგან ამ გიჟურ მიხტომას და თარეშს, შეიძლება ის ხალასი ქეშ-მარიტება შეგვკრჩეს ხელში, რომ შამილმა ჯავრი იყარა ქართველებისა იმ უსაზღვრო და ბრმა ერთგულობისთვის, რომელსაც ქართველობა უწევდა რუსის მხედრობას. ხუმრობა ხომ არ იყო, საცა არა გგონია, ყველგან ქართველი უწვრილებდა გულს შამილსა და მის მიურადებს. თვით გუნების არემარე კლდეებზე იერიში რომ მიიტანა რუსის ჯარმა და ჯარის კაცნი რომ თოკის კიბეებით, ან ფოფხვით ზემო-ზემო მიდიოდნენ, პირველად ქართველები, სრესული და თურქესტანიშვილი შეცვივდნენ სიმაგრეში და მათის მაგალითით გამხნეებულნი სხვებიც მხნედ და თამამად იწევდნენ წინ. ასეთი თავის გამოდება ქართველისა რუსობისთვის ცოტა არა ჰქონდა ნახული და გაგონილი დაღესტნის იმამს.

სათქმელი ისიცაა, რომ დიდი პოლიტიკური გულთა მხილაობა მაინც და მაინც ვერც მთამ გამოიჩინა. მთელი მეთვრამეტე საუკუნე ისე დასრულდა, რომ ერთი დღე ბედნიერი არ უნახავს ლეკთაგან ქართველობას. რუსობა რომ დაბინავდა ჩვენში, მაშინაც კი თავზე ხელ-აღებულნი ბრბონი დაღესტნისა თამამად დათარეშობდნენ ქართლ-კახეთის ველ-მინდორზე და ხშირად

შვილია ჩვენის ცნობილის პოეტ ალექსანდრე ჰაეჰავაძისა და შვილის შვილი გარსევან ჰაეჰავაძისა, ქართველ მეფეთა ელჩად რომ იყო პეტერბურგს.

ტყვედ ჩაუვარდა შამილს დავით ჰაეჰავაძის ცოლი ანნა ილიას ასული და ცოლის და კნეინა ბარბარე ილიას ასული ორბელიანისა. ტყვეების დასახსნელად შამილმა მილიონი მოითხოვა და უფროსის შვილის ჯამალ-ედინის განთავისუფლება, მაგრამ ბოლოს ორმოც ათას მანათს დასჯერდა. შუა კაცად იყო პოლკოვნიკი ლაზარევი, შემდეგ რუს-ოსმალთს ომიანობის დროს თავი რომ ისახელა. თარჯიმანობდა ლეკურის კარგი მცოდნე გრომოვი, ტომით სომეხი. შამილის უფროსი შვილი ჯემალ-ედინი რუსებმა განთავისუფლეს ტყვე კნეინების სანაცვლოდ. წარჩინებულ თ. ჰაეჰავაძის სახლობის დატყვევებამ მაშინდელ პეტერბურგს თავხარი დასცა.

იმერეთსაც კი უწევდნენ ხოლმე. გამოდის რომ, როცა შამილმა შეიგნო ძალა ერთობისა და ფრიად საჭიროებად საქართველოს მეგობრულ განწყობილებას, ცოტა არ იყვეს, დაგვიანებული აღმოჩნდა ასეთი შეგნება, რადვან ჩატეხილ ხიდის გამთელება გაჭირვების დროს არცაუ აგრე აღვილია.

იერიშით ალება გუნებისა და შამილის დატყვევების ამბავი მოკლედ და მკაფიოდ დასწერა რუსულად ჩვენმა თანამემამულე პოდპოლკოვნიკმა სიმონ ესაძემ. *)

მშვენიერი სანახავი ყოფილა შამილი, გუნებიდან რომ გამოდიოდა. თან ახლდა მხოლოდ 40 მიურიდი. სახეზე სიკვდილის ფერი ედოვო, ამბობს მეისტორიე ესაძე, მაგრამ მის გაფითრებულ სახეს და იერს მაინც ემჩნეოდა დიადობისა და ზვიადობის ბეჭედიო. გრძელი სქელი წვერი და უმტვერო ქალღლივით თეთრი ლეჩაქით მობურული დოღბანდი მალალსა და ახოვან ტანს შამილისას მეტის-მეტად უხდებოდაო. ჯარმა რომ თვალის მოჰკრა ამ საოცარ ვაჟკაცს, თავი ველარ შეიკავა და ელვა-ქექასავით იგრილა ჩვეულებრივმა „ურამ“. ეს ისაა, ეს ისააო, გაისმა ჩურჩული ჯართა რაზმების შორის. შამილი შეტკრთა და უკან გაბრუნება დააპირა. პოლკოვნიკმა ლაზარევმა დაამშვიდა შამილი, ეს ძახილი და გრიალი სიხარულის ნიშანიაო. შამილმა მოითხოვა, თუ ჯარს არ ჩამომაცლით გზიდან, მუსულმანთა რაზმები მაინც მომაცალეთ გზის პირიდან, არ მესიამოვნება, ჩემიანები რომ მიცქერიან პირთა და თვალში ამ ჩემის უბედურების და დამცირების დროსაო.

*) აი სრული სათაური ამ ფრიად საყურადღებო ისტორიულის მონოგრაფიისა: Штурмъ Гуньни и плененіе Шамилъ. 1859—1909 г. უმთავრესი წყარო და ხელმძღვანელი ამ ისტორიულის ამბისა ესაძის შრომა და ამის გამო საჭიროდ აღარ მიგვაჩნია ვუჩვენოთ ხოლმე სხოლიოებში, თუ რომელი ცნობა წიგნის რამელ კაბადონიდან ვისესხეთ. ამბავს ვავსებთ ჩვენის საკუთარის ცნობებთაც.

თ. ბარიათინსკის ბანაკს რომ მიუახლოვდა, ცხენიდან ჩამოხტა შამილი და ფეხით გასწია ქვაზე მჯდომ მთავარ-სარდლისკენ და სალამი მისცა. მოწყალებით მიიღო თავადმა ფრთა მოტეხილი არწივი და არ იკადრა იარაღის აყრა და ჩამორთმევა.

მეორე დღეს შამილი და მისი ცოლშვილი პეტერბურგს გაისტუმრა ბარიათინსკიმ და ასეთი დეპეშა გაუგზავნა ალექსანდრე მეორეს: გუნიბი ავიღეთ და შამილი დავატყვევეთ; ხოლო ჯარსაც ლაკონიურად მიულოცა: კავკასიის ჯარო, შამილი დატყვევებულია, მოგილოცავთ ამ ამბავსაო.

საყურადღებოა ქართველ თავად-აზნაურობის ადრესი, თავად ბარიათინსკის რომ მიართვეს შამილის დატყვევების გამო.

...საჩაჩნოსა და დაღესტნის დაქერით და დამშვიდებით, უბრწყინვალესო თავადო, სწერდა ქართველი ბრწყინვალე წოდება, თქვენ აღასრულეთ ვალდებულება, რომელიც იკისრა წინაშე მთელის ქვეყნისა რუსეთმაო... რამდენად მცირე იყო პოლიტიკური გავლენა საქართველოსი ქვეყანაზე, იმდენად ძლიერი იყო საქართველოს ზნეობრივი ძალა და მონაწილეობა კაცობრიობის განვითარებაში. განგებამ დაიფარა საქართველო ათასგვარ კირსა და ბოროტებაში, ვითარცა მომფენი ქრისტეანობისა ამიერ-კავკასიის ერთა შორის. საქართველო მართოდ-მართო ებრძოდა ისლამის მიმდევართ რამდენიმე საუკუნის განმავლობაშიო.

დღეს თქვენის უკვდავის ღვაწლის მეოხებით აღესრულა წმიდა დანიშნულება საქართველოსი. დაუსრულებელი ომი გათავდა, ტყვედ ჩავარდნილნი ბრუნდებიან თავთავიანთ ოჯახსა და სახლებში. მშვიდობა გამეფდება იქ, სადაც ათასწლობით მიწის მუშაკისთვის იარაღი და გუთანი განუყრელი იყოვო.

პეტერბურგიდან შამილი მალე გამოისტუმრეს და დააბინავეს ქ. კალუგაში, სადაც სცხოვრობდა 1870 წლამდე. ამ წელს შამილმა დაათვალიერა კიევი და შემ-

დღე გაემგზავრა წმინდა ქალაქ მექქას და იქ გარდაიცვალა 1871 წ. მარტის თვეში, ღრმად ზოხუცებული.

ავარიის შუაგულს დაბადებული, სოფელ გიმრას, მთის სუფთა ჰავით ნაზარდი და მთისავე ანკარა წყაროთივე დავაჟკაცებული, მთის არწივი შამილი, იმამი დალესტინისა, ეს დაუძინებელი მტერი რუსობისა, განისვენებს არაბეთის უდაბნოს პირზე, ცხელსა და ქვიშით მოწამლულ ჰაერზე.

ასეთი იყო უკუღმართი ბედი ამ საოცარის გმირისა და მთის სულის ჩამდგმელისა მთელი ნახევარი საუკუნე.

II

შამილი — ადმინისტრატორი.

შამილი დაიბადა მეთვრამეტე საუკუნის მიწურულეებში, მეისტორიე ს. ს. ესაძის სიტყვით — 1798 წელს, ხოლო სხვა წყარონი უჩვენებენ დაბადების წელიწადად 1797, ან 1799-ს. ეს ის დრო იყო, როდესაც თავისუფალ საქართველოს თავისუფალ არსებობის დღენი იღეოდა და დარიალის დახშული კარი იღებოდა ქართველ მეფის ხელით ვითომდა იმ იმედით, რომ ჯვარი ქრისტესი საჭიროების დროს კვლავ ამოჰქოლაოდა ყურთამდე დარიალს. ეს ის დრო იყო, როდესაც პატრი ნიკოლა თამამად, გულწრფელად მოახსენებდა თავის ნწყალობელ მეფე გიორგი XIII-ს — რუსის დალაბანდის ბრახუნი ნიშანია საქართველოს სკითარსებობის დასასრულისა.

ამიერ-კავკასიის ერთს უძველეს ნაწილს — საქართველოს პოლიტიკური ტანი რომ ერღვეოდა და ჩინჩხვარივით იფუშებოდა ძველი აგებულება სახელმწიფოსი დალაბანდის ბრახუნის მოძახილზე, სწორედ ამ ტრალიკულ დრო-ჟამს, საქართველოს აღმოსავლეთით, დალესტინის მიუვალ მთებსა და კლდეთა შორის გაჩნდა ყრმა, რომელსაც თითქოს განგება ავალეებდა საქართველოს მეფეთა მემკვიდრეობას. რაკი ბაგრატიონთ და ბარმა ვეღარ შესძლეს მალლა ეფრიალებინათ თავისუფალ, დამოუკიდებელ არსებობის დროშა, მისი პატრონობა და გაძლოლა იმავე

განგებამ გადაულოცა მთას, იმ მთას, რომელსაც ჯერ რიგიანად არ ეწვინია, თუ რა ხილი იყო სრული პოლიტიკური და სახელმწიფო ცხოვრება.

ჯერ ისევ სიჭაბუკეში, თვის საყვარელ მეგობარს და მასწავლებელს კაზი-მოლას რომ ახლდა, შამილმა გამოიჩინა შესანიშნავი ნიჭი წვრილ-წვრილ ტომთა შეწებება — შეკოწიწებისა. გონიერი ყვაწვილი ანაზღეულად მიხვდა, თუ რისთვის უცემდა მთას მაჯა, და რაკი შეიგნო და შეითვისა მთიულის გულის დარდი და ვარამი, თამამად გამოაცხადა, საერთო მტერი რუსობაა, ესაა შავი ნისლივით რომ ეღება კავკასიონის ქედსა, მის კალთა-ტოტებს და თუ თავასუფალი არსებობა გვწადიან, კორიანტლად უნდა გადავიქცეთ ნისლის გასაფანტავადო. ამ გვარად შამილმა მტერსა და შოკეთეს საერთო საქმე გაუჩინა.

შამილი გაიმსქვალა და გაიტაცა მართვა-გამგეობის იმ წესმა, რომელიც მონათლულია ცენტრალიზმის სახელით და რომლის მარტო ერთი სახელი დღესაც ბევრს ათრობს და ატორტმანებს, თითქოს ბანგი დაუღუვიანო. მოკლე შედარებით რომ შეიძლებოდეს შამილის მისწრაფება — სურვილის დასურათება, გავებდავთ და ვიტყვი, რომ შამილი ადგა იმავე გზას, რა გზითაც დადიოდა დიდებმა საქართველოს ისტორიისა, მეფე დავით აღმაშენებელი.

რაკი შამილმა ნათლად და მკაფიოდ გაითვალისწინა მომავალი ასპარეზი, რაკი დარწმუნდა რომ გამარჯვებისათვის საჭიროა ერთის კაცის ბატონობა და ბრძანების გაცემა ერთის ცენტრიდან, აღარას ერიდებოდა იდეალის განსახორციელებლად. მთის გაბნეული ტომნი, უფრო კი ჩაჩანნი და ავარელნი ისე შეჰკრა და შეჰბოჰა შამილმა, კაცს ეგონებოდა, დუღაბი გადუსხამს; ან და რკინის საღებები მოუჭერია ალთასა და ბალთისაკენ მაყურებელ მთიულებისთვისაო.

უპირველესი და უძლიერესი დუღაბი და საღება, რასაკვირველია, იყო სარწმუნოება და რჯული მაჰმადისა. ამას მოჰყვა შარიატი, რომელსაც სრულიად უხდა

დაეთრუგვნა და განედევნა ხალხის ყოველდღიურ ცხოვრებიდან ადათი და ჩვეულება. ქვიანი და გონიერი აღმინისტრატორი შამილი ამას არ სჯერდებოდა და ათას სხვა ღონესა და ხერხს ხმარობდა, რომ თავისი გაეყვანა. მაგალითად დიდად უწყობდა ხელს შერეულ ქორწინებას და აქეზებდა ახალგაზღობას საცალო შორეულ ტომიდან მოეყვანა. ასეთის ქორწინების წყალობით დიდად მტკიცდებოდა ნათესავობა, მეგობრობა, მეზობლობა და სიყვარული დაშორებულ ტომთა შორის.

რუსებთან განუწყვეტელ ომიანობის გამო დიდძალი ვაჟკაცობა წყდებოდა. ავარია და საჩაჩნო ხომ აივსო ქვრივ-ობხად დარჩენილ დედა-კაცობით. გასათხოვარი ქალები საქმროებს ველარ შოულობდნენ. ქალწულთა და ქვრივთა გოდებამ და ღრტვინვამ გააყრუა დაღესტნის ხევ-ხუენი და სოფელნი. საჭირო შეიქმნა მალამოს გამოძებნა მომავალ აჯანყების ჩასაქრობად, რადგან წინასწარი ნიშნები ყველას თვალში ეჩხირებოდა. შამილმა ამ გაჭირვებასაც ადვილად დაახწია თავი. სასტიკად უბრძანა ნაიბებს—დრო გამოშვებით შეჭკრიბეთ ხოლმე ქალწულნი და ქვრივნი წინდაწინ გამოცხადებულ სოფლებში და ათქმევინეთ, ვის ვინა ჰსურს ქმრად, სულ ერთია როგორი იქნებოდა საქმრო, ცოლიანი თუ უცოლო. მამაკაცებს არაფრად ექაშნიკათ ასეთი ბრძანება და ძალით ცოლების შერთვა, მაგრამ ურჩობას ვერაფერს ვერაფერად ვაძგიუტებულნი ვაჟკაცი ცოცხალი ვერ გადურჩებოდა შამილის მრისხანებას და წყრომას. პირველად დედაკაცებსაც ეუცხოვათ ეს სასტიკი ბრძანება, რადგან ქალი მუდამ ქალია და ჩვეულებრივი კდემ-მოსილობა ხელს უშლიდა დაესახელებინა საქმრო საჯაროდ წინაშე ქვეყნისა და შეკრებილ თემისა, მაგრამ მალე შეეჩვივნენ ახალს წესს და აღარ თაკილობდნენ საქმროების დასახელებას და არჩევას.

ასეთის დროსა და გარემოების შეფარდებულის განკარგულებით შამილმა უცბად ჩააქრო იქვე სათავეში ქალთა გულში დაგუბებული უკმაყოფილება და შშენიერ-

რი სქესი დაღესტნისა თვით ერთგულ მომხრეებად გადა-
აქცია. მადლოზელმა ქალებმაც ბევრჯელ დაუმტკიცეს
იმამს თავისი გრძნობანი და სიყვარული. 1840 წელს
რუსებს რომ აუჯანყდა თითქმის დაწყნარებული საჩაჩნო,
ეს სულ ჩაჩან ქალების უნარი და მამულიშვილობის ბრა-
ლი იყო.

ქვეიანი შამილი კარგად ჰხედავდა ძალად ქორწინე-
ბის უხერხულობას, მაგრამ რა ვუყოთ, გარემოება ასეთია
და ბედს უნდა დავმორჩილდეთო. განა თვით განათლე-
ბული ევროპელნი ყველა თავის ნება-სურვილით ქორ-
წინდებიანო? განა ცოტაა მათში ისეთნი, რომ ცოლს ირ-
თავენ დედ-მამის ბრძანებით, ან სხვა რაიმე ანგარიშით,
სადაც სიყვარულს სრულიად ადგილი არა აქვსო? დასა-
ვიწყარი არც ისაა, რომ მაჰმადის რჯულის მიმდევართა
შორის ძალად გათხოვება ისე არაა დასაგმობი როგორც
ქრისტიანთა შორის, რადგან იქ განქორწინება ძლიერ
ადვილია. თუ შეუდღენი ვერ შეეგუვებოდნენ ერთმანეთს,
ვერაფითარი დაბრკოლება ვერ შეუშლიდა ხელს გაყრას
და ამ გვარად აღარ მოუწამლავდნენ სიცოცხლეს უსი-
ყვარულო და დაობებულ ცხოვრებით ერთს სარეცელზე
და ერთ ჰერ ქვეშ.

დიდი რუსეთი და მწირი დაღესტანი საჭიდაოდ რომ გა-
ვიდნენ და როგორც ეტყობოდათ, ერთმანეთის პირის კოც-
ნას არ აპირებდნენ, ადამიანს ზღაპრული სურათი გადაეშა-
ლა თვალწინ. ჩრდილოეთიდან ბუმბერაზი, აბთავიანი ბაყ-
ბაყ მღვევი მოალაჯუნებდა ბარკლებს, ხოლო სამხრეთიდან
ეგებებოდა, მართალია, ქურციკივით მარდი, მაგრამ
მკლე და სუსტი მთიული: აბა სად გოლიათი და სად
მწყემსი! საკვირველი დღესაც ისაა, როგორ გაუძლო
გოლიათს მწყემსმა მთელი ნახევარი საუკუნე და პირველ-
სავე შეტაკებაზე როგორ არ გაწყდა წელში მთიული!

მტერი შამილისა ძლიერი, მრავალ-ერიანი და
მდიდარი იყო. ამასთან რუსეთს შეეძლო გამოეყვანა შა-
მილის წინააღმდეგ ევროპულად მოწყობილი და სას-
ტიკის დისციპლნით შეკრულ-შებოქილი ჯარი. სურდს-

თი და სანხედრო მასალა საზრუნავი ავრე რიგად არა ჰქონდა რუსის მხედრობას. სურსათისა და ტყვია-წამლისათვის ზრუნავდა ცალკე დაწესებულება. სულ სხვა იყო შამილის საქმე: ჯარის კაცი შამილისა მეომარი ზონ იყო და იყო, სასმელ-საქმელზედაც თითონ უნდა ეზრუნა, ტყვია-წამლი, იარაღი და ცხენი ყველაფერი მისი საზრუნავი და თავშისაცემი იყო. შამილის მხედრობა უფრო საერო მილიციას წააჯავდა ვიდრე წინადღე შემუშავებულ წესსა და რიგზე გაწვრთნილ ჯარსა. განსაკუთრებით: დიდს შრომასა და ზრუნვას თხოულობდა. ცხენოსანი ჯარი.

დაღესტანი და საჩაჩნო შამილმა დაანაწილა ათასათას კოძლიან სახაიბოდ, რომელთაც განაგებდნენ ნაიბნი. თექვსმეტი წლიდან მოკიდებული სამოც წლამდე თვითული ბეკიდრი მოვალე იყო ჯარში ემსახურა. თოფი, დამბაჩა და ხმალი ყველა მეომარს საკუთარი უნდა ჰქონოდა. შეძლებული მეომარი ცხენით გადიოდა ჯარში და უკეთუ თითონ ვერ წავიდოდა სალაშქროდ ავადმყოფობისა, ან კრილობის გამო, ცხენი სხვისთვის უნდა ეთხოვებინა. მეომარს საგზალი შინიდან მიჰქონდა, ხოლო თუ დიდხანს დარჩებოდა ლაშქარში, მაშინ იოლად მიდიოდა რეკვიზიციის დახმარებით, ესე იგი ძალით ართმევდა ნუგზალს იმ სოფლებს, სადაც ჯარის ლაშქარი იკრიბებოდა, ან მოქმედობდა.

შამილის დროს მთელი საჩაჩნო და დაღესტანი ერთს თვალუწვდენელ სამხედრო ბანაკს წარმოადგენდნენ. ან კი რა უნდა ექმნათ, ასე რომ არ მოქცეულიყვნენ. რუსეთი ყოველის მხრიდან აწვებოდა მთას და ცხოვრების საღსარს ნელ-ნელა უსპობდა. რაოდენ ნაბიჯსაც კი წინ გადასდგამდა რუსეთი, ამდენს ან სოფელს, ან სტანიცას გამოსქიმავედა და ავისებდა ყაზახებით, ან ციხე-სიმაგრეს აშენებდა. მთიულების ჩამორთმეული სახნავ-სათესი და საძოვარი ადგილები ეძლეოდა სტანიციის ყაზახობას, ხოლო მათი ბატონ-პატრონი, მკვიდრი მთიული, ულუკმაპუროდა რჩებოდა და უკან-უკან იწევდა მთის სიღრმესა

და მიუვალ ხეობებში. რამდენსაც უკან იხევდა მთიული, იმდენად უძნელდებოდა ცხოვრება და მაშასადამე იზრდებოდა და მატულობდა მძულვარება რუსებისადმი.

ბოლოს საქმე იკამდისინ მივიდა, რომ რუსის მხედრობამ და ყაზახობამ სრულიად ჩაკეტეს ხეობებიდან გამოსასვლელი გზები ბარში. ვიდრე რუსეთი მარტო ჩრდილოეთიდან და აღმოსავლეთიდან აწვებოდა მთას, კიდევ იყო სალსარი განძრევისა და მოქმედებისა, ხოლო როცა რუსეთმა დაიმკვიდრა ყირიმი, მდინარე ყუბანის შესართავი და ძირობანი და საქართველო, კავკასიის უღელ-ტეხილის და მის უბეა-კლთებზე დაფენილ სოფელთა ბედი სამუდამოდ გადასწყდა. ყაზახთა სტანიცების გაშენებამ სამსა და ოთხს წყებად ჩრდილოეთით და აღმოსავლეთ—დასავლეთით მთას სული შეუგუბა. საქართველოდანაც მთავრობამ დაღესტანს შემოაგლო რკინის სალტა, რომელსაც სახელად უწოდეს სალეკო კორდინის ლინია, ანუ ხაზი. ეს ლინია იწყებოდა ს. ახმეტასთან, მიდიოდა აქედან ს. ფშავლამდე, საცხენისზე, ყარათუბანზე, ლაგოდებზე, ბელაქანაზე, ქარზე. ახალ ზაქათალაზე, მუხახზე და სხვა. ამ ლინიის გაბმით დაღესტანს ის მოუვიდა, რაც დაემართება ხოლმე ხაფანგში დამწყვდეულს თავეს. რომ იტყვიან, სწორედ განძრევის თავი აღარა ჰქონდა დაღესტანს. მართალია, შამილის დროს სალეკო კორდონის ლინიაზე სტანიცებს არა მართავდნენ, მაგრამ რაც მაშინ არ გაკეთებულა, დღესა კეთდება. ჯერ ისევ გალიცინის დროს ლაგოდების რაიონში რამდენიმე ახალი სოფელი გააშენეს, სადაც დააბინავეს ომის მოყვარე ყაზახების მაგიერ მცირე რუსნი, ანუ ხახლები, და ზოგსაც ეხლა აკეთებენ.

ასე გაგულული და გათანგული მთა იძულებული შეიქმნა ყრონქში სწდომოდა რუსეთს და ან მოეშორებინა თავიდან რუსეთი და რუსობა, მაჯლაჯუნასავით რომ დააწვა მას და სულს უხუთავდა, ან დედა-ბუდიანად გაწყვეტილიყო, ამოვარნილიყო და აღგვილიყო ამა ქვეყნისა პირისაგან.

სწორედ ამ ისტორიულ პირობებში უნდა ვეძებოთ სათავე სასტიკისა და უღმობელ სამღვთო ომისა, რომელიც გამოუცხადა რუსობას ჯერ ისევ დაღესტნის პირველ იმამმა კახი—მოლამ. ასეთს ომს ეძახიან გაზავატს, ან წმინდა და სამღვთო ომს რუსების წინააღმდეგ.

სულ სამი იმამი ჰყავდა დაღესტანს: კახი-მოლა. ჰამზად-ბეგი და შამილი. მართალია, პირველმაც და მეორემაც თავი შეაკლეს რუსებს და დიდი წინააღმდეგობა ვაუწყის გამარჯვებულ წინსვლას და ყაზახთა სტანიცების პედნიერსა და კეთილ ცხოვრებას, მაგრამ სავსებით და თითქმის უნაკლულად მართო შამილმა მოახერხა განხორციელება გაზავატის დედა-აზრისა. ოცდა ათის წლის ღვაწლი ემ მოქალაქობა შამილისა მართო ის იყო, რომ მოეშორებინა კისრიდან მალრჩობელა საბელი, რადა მთას თავისუფლად ესუნთქვა და სხვის კლანჭებში სული არ ამოხდენოდა.

თავის დროს შესაფერად შამილი სწავლულ კაცად ითვლებოდა. ძლიერ ეტანებოდა წიგნსა და საღვთისმეტყველო არაბულ მეცნიერებას შამილზე ამბობდნენ, რომ ვანსწავლულია და მეცნიერი როგორც აკუმის ყადიო. შამილი ოცდა ათი წლისა იყო, უკვე მეორე ცოლი ჰყვანდა, მაგრამ მაინც მთიელი სამი წელიწადი წიგნს თავს არ ანებებდა. რაკი ასეთი ბეჯითი იყო სწავლაში. უეჭველია ზედ მიწევნით შეითვისებდა შამილი იმ კოდნას და მეცნიერებას, რაც კი რამ მოიპოვებოდა მაშინდელ დაღესტანში. იმ დროინდელ მეცნიერების შესისხლხორციელებით და საოცარის ადმინისტრაციულეს ნიჭით აიხსნება ის გარემოება, რომ შამილმა განიზრახა და სისრულეში მოიყვანა კიდევ მთისთვის დაწერილ კანონის მიცემა. მისის ბრძანებით მეცნიერმა ჰაჯი იუსუფამ დასწერა ძეგლის დება, სადაც გარკვეულია—რა გვარისა და ზომისაა დიდის იმამის უფლებანი და იმამის მახლობელ თანამშრომელთა. დიდის ოსტატობით და თანდათანობით ჩაქსოვილია თურმე ძეგლის-დებაში აზრი და საჭიროება საადმინისტრაციო ცენტრალიზმისა.

პირველი მასწავლებელი შამილისა ყოფილა კახი-მოლა, სულ ოთხის წლით უფროსი შამილზე. ამან ასწავლა შამილს მეცნიერებასთან ერთად სიძულვილი შემოსეულ მტრისა. ფიზიკურ ვარჯიშობასაც ყურადღებას აქცევდა კახი-მოლა და ისეთი ნიჭი გამოიჩინა შამილმა სიჭაბუკეში, რომ ბევრის მნახველი და ბევრის მომკმედი მთიული განცვიფრებული რჩებოდა, შამილის ვაჟკაცობას რომ ხედავდა. ოცის წლის შამილი თავისუფლად ახტებოდა დიდ პირიან ხეებს და ფლორცევებს.

ესაა დახლოებით შამილი, რომელმაც კინაღამ შესცვალა მეცხრამეტე საუკუნის ისტორია ამიერ-კავკასიისა, დროზედ რომ მხარი დაეჭირა ვისმეს. ვერც ოსმალეთი და ვერც სპარსეთი ქომაგად ვერ გამოდგნენ, ხოლო საქართველომ ცეცხლზე ნავთი დაუსხა.

მაშასადამე შამილს უნდა წაეგო საქმე და ავიწაო კიდეც.

III

გენერალ-ადიუტანტი გრაბზე და იჩკერიის ტყე.

ჩვენ აზრად არა გვაქვს სავსებით ავსწეროთ შამილის ლაშქრობა და შეხლა-შეტაკება რუსებთან. მთელი მისი სიკოცხლე განუწყვეტელი ომია რუსის ჯართან და რუსის მთავრობასთან და დაწვრილებით რომ გამოუდგეთ მათ აღნუსხვას, ძალიან შორს წაგვიყვანს ასეთი განზრახვა. ვფიქრობთ, რომ საჭიროც არაა ამგვარი შრომა. თუ კი დეაწლი და მოქალაქობა ერეკლე მეორესი ჯერ არ არის შესწავლილი და მადლიანის კალმით აღწერილი, როგორღაც გვეჩოთირება სხვათა გმირის და ქვეყნის ისტორიის გადმოცემა უმეტნაკლოდ. ვისაც ხალხისი დაებადება შეისწავლოს შამილის ისტორია უნაკლოლოდ და გაითვალისწინოს ყოველი წვლილი შამილის მღელვარებით სავსე და შფოთიან ცხოვრებისა, იმან უნდა მიმაროოს ს. ს. ესაძის რუსულად დაწერილ წიგნს.

თუ რა უნარი ჰქონდა შამილს და რის შემძლე იყო ეს საკვირველი და საოცარი მთის არწივი, ნათლად სჩანს იქიდან, რაც თავს დაატეხა გენერალ გრაბბეს 1842 წ. და გრაფ ვარანკოვს 1845 წელს.

1839 წელიწადი ნავსიანი იყო შამილისთვის. თითქოს ერთი ცხვირი დააცემინა ამ წლის პირველ იანვარსა და ნავსობა დაებედაო, შამილმა ვერ გაიხარა ამ წელს და რამდენჯერაც შეებრძოლა რუსებს, იმდენჯერ ღამარცხდა და დიდად დაზარალდა. ისე დუნედ და უიღბლოდ მიდიოდა მისი საქმე, რომ 1839 წლის მიწურულეებში რუსები აშკარად გაიძახოდნენ, შამილის საქმე წასულია, წელში ველარ გასწორდება და იარაღს დაჰყრისო.

1839 წლის დასაწყისს შეიკრიბა ჩრდილოეთ კავკასიაში განსაკუთრებული რაზმი, სახელად საჩაჩნო, რომლის უფროსად დანიშნეს სამთო ომში უკვე სახელგანთქმული სარდალი გენერალ-ადიუტანტი გრაბბე. მთავრობა დარწმუნებული იყო, რომ ასეთი გამოცდილი კაცი მთიულებთან ბრძოლაში, როგორც იყო გენერალი გრაბბე, შამილს მალე მოუღებდა ბოლოს და იმპერიატ ბოისვენებდა ამ ონავარ და გაუტეხელ მეომრისაგან.

მართლაც გაზაფხული და ზაფხული 1839 წ. სასიკეთო და საიმედო ნიშნებით დაიწყო რუსებისთვის. მაისის თვეს გენერალი გრაბბე შეიქრა მოულოდნელად საჩაჩნოში, აიკლო და დასწვა რამდენიმე სოფელი და 15 მაისს დაბრუნდა გამარჯვებული ვნეზაჰნის ციხე-სიმაგრეში შესასვენებლად.

21 მაისს გენერალი გრაბბე ხელმეორედ შეესია საჩაჩნოს და მიაღწა სოფელ არგუანს, სადაც დაბანაკებული იყო შამილი 16.000 მეომრით. გაიმართა ომი ფიცხელი და მწარე, ერთმანეთს აღარ ინდობდნენ მეომარნი. ხელჩართული ჩეხა-ყლეტა თორმეტს საათს გაგრძელდა და აბა იანგარიშეთ, რა გაალმასებულნი და ბრაზითა და ბოროტებით იქნებოდნენ აღსაესე მოპირდაპირ-

რენი. შამილმა დაჰკარგა ორი ათასი მეომარი არგუანის ბრძოლაში, ხოლო რუსებს დაუხოცეს 642 კაცი.

აიყარა შამილი არგუანიდგან და დაბინავდა სოფ. ახულგოში. გენერალი გრაბბე ფეხ-და-ფეხ გაჰყვა შამილს და მიადგა ახულგოს. მთელი ათი კვირა გარს უვლიდა გრაბბე ახულგოს, სცდილობდა ალყა ისეთი ყოფილიყო, რომ სოფლიდან ვერავინ გამოსულიყო და ვერცავენი შესულიყო, მაგრამ ეტყობა რუსებმა ვერ მოახერხეს ასეთის ალყის შემორტყმა. რაკი ყველა გასასვლელ-შემოსასვლელი გზები ვერ შეჰკრა გრაბბემ, შამილს მაშველი ჯარი ნაწილ-ნაწილ მოსდიოდა და მათის შემწეობით ორის მხრიდან გარს მოეწყო შამილი რუსის მხედრობას.

ახლა-კი შეფიქრიანდა გენერალი გრაბბე და დროზე აცნობა სამურის რაზმის უფროსს გენერალ გალაგინს თვისი გაკირვება. გალაგინმა ხანი აღარ ახანა და დაიძრა თვისის ძლიერის რაზმით ახულგოსაკენ. ორის რაზმის შეერთებამ გადასწყვიტა ამ სოფლის ბედი. რუსებმა იერიში იერიშე მიიტანეს და ბოლოს 21 აგვისტოს დიდის სიმტკიცით და ხელალებით დაჰკრეს ციხეს. მაინც ორი დღე გაუძლო ახულგომ სასტიკს და შეუბრალებელს იერიშს და ღონე გამოლევული დაეცა. მომეტებული ნაწილი ციხის დამცველთა ამოკლიტეს რუსებმა, ხოლო ცოცხალი ვინც გადაარჩა, მთასა და გორებში გაიფანტა. თვით შამილი ხელიდან გაუსხლტა რუსებს. მართალია გზაში დასკრეს შამილი, მაგრამ მაინც გაასწრო საჩაჩნოში გასვლა და დაბინავება არგუანის ხეობაში.

აზრი 1839 წლის შექრისა საჩაჩნოში ის იყო, რომ შამილი ან მოეკლათ, ან დაეტყვევებინათ. თუმცა ვერც ერთი და ვერც მეორე გრაბბემ ვერ მოახერხა, მაგრამ გენერალი მაინც კარგ გუნებაზე დადგა და ჰფიქრობდა, რომ აღარა ღირს დამარცხებულ და დაკოდინ შამილის უკან დევნა და საფლავამდის ჩაყოლაო. ასე ჰფიქრობდა

და ოცნებობდა გენერალ-ადიუტანტი გრაბზე: მაგრამ ბედის ჩარხი მალე სხვანაირად დატრიალდა.

საანბანო ქეშპარიტებადაა აღიარებული, რომ ჯერ-ჯერობით რუსებმა ადვილად იცოდნენ სხვა და სხვა ქვეყნისა და ერის დაპყრობა, ხოლო მოვლას-პატრონობას დაპყრობილ ქვეყნისა, წესისა და რიგის შემოღება როგორც არ ეხერხებოდათ. სწორედ აქაც იგივე განმეორდა, რაც სხვაგან და მრავალჯერ მომხდარა. საჩაჩნოს დაპყრობილ დაბა-სოფლებში რუსის მთავრობამ ჩააყენა სამოქალაქო საქმეთა გასაძღოლად და ხალხის სავატრონებლად ბოქაულები. ალბად ეს ბოქაულები არაფერი ჩამოუვარდებოდნენ ნეტარ-ხსენებულ კაპიტან-ისპრანნიკებს, საქართველო რომ გააბედნიერა გენერალ კნორინგმა, და იწყეს საჩაჩნოს გაძგეობა და პატრონობა „პრისტაველად“.

უწინარეს ყოვლისა ბოქაულებმა მოსთხოვეს ჩაჩნებს, იარაღი აიყარეთო. დროსა და ეამის შეუფერებელმა განკარგულებამ მთელი საჩაჩნო ყალუხე დააყენა, როგორ თუ იარაღი უნდა ავიყაროთო. ჩაჩანი, ავარიელი რის ჩაჩანი და ავარიელია, თუ-კი წელზე ხმალ-ხანჯალი არ ერტყმისო. ბრაზ-მორცული ხალხი იმასაც კარგად ჰხედავდა, თუ რა სამართალს უჩენდნენ ბოქაულნი მომჩივან-მოპასუხესა. აბა სად ბრძნული სამართალი და განჩინებანი შამილისა და სად სამართალი მაშინდელ ბოქაულებისა. მოთმინებიდან გამოსულმა ხალხმა იხუვლა და თავი დაუკრა ახულგოსთან ვითომდა სამუდამოდ დამარცხებულ შამილს, შენს მეტი ბატონ-პატრონი არავინ გვინდა, გვიწინამძღვრე და გვიმსახურეო.

შამილი პირველად ცოტა არ იყო გაინახა. აქარ შემოძლიან ვიტყვირთო თქვენი წინამძღოლობაო. მაგრამ როცა თხოვნა და მუდარა ჩამდენჯერმე განუმეორეს, ამანათები მისცეს ნიშნად იმისა, რომ არ უღალატებენ და შეჭფიცეს—თავს დავსდებთ შენის გულისთვისაო, მოლბა და ისმინა აჯა საჩაჩნოსი. ოსტატი იყო შამილი

და კარგად იცოდა, სად და როგორ უნდა მოქცეულიყო.

როგორც ფენიქსი ნაცრიდან, ისე განახლდა შამილი 1840 წლის დასაწყისში, ერის ნდობით აღფრთოვანებული და გამხნეებული. ვინ იტყოდა მისი ამ დროს მნახველი, რომ შამილი ეს ის შამილია, რომელიც შარშან ახულგოსთან მწარედ დაამარცხეს გრაბბემ და გალავინმა და გაქცეული იქიდან გზაში დასკრეს! სულ მცირე ხანს შამილმა მთელი მცირე საჩაჩნო ფეხზე დააყენა და დააწყო პატარა-პატარა რაზმებად. წარმოუდგენელის სისწრაფით რაზმები იქ იბადებოდნენ, სადაც სრულიად არ ძოვდოდნენ და იკლებდნენ და მუსრს ავლებდნენ რუსის პატარა და უღონო რაზმებს და მეციხოვნეთ. მათის დევნით და მოგერებით რუსის მხედრობის ცალკე რაზმები წელში გასწყდნენ და არაქათი გამოეღლიათ.

შამილის მეომარი რაზმები, რომელთაც წინამძღოლობდნენ სახელოვანნი ვაჟაკნი: ჰაჯი-მურატი, კიბიტ-მაგომა და ახვერდი-მაგომა ისე გათამამდნენ, რომ სადავლოდ რუსების ასაკლებად კასპის ზღვის პირს უწევდნენ ხოლმე, ეცემოდნენ თემირხანშურას და მდინარე თერგის ძირობამდის ჩადიოდნენ. მშვიდობიანი მისვლამოსვლა შარა გზით კასპის ზღვის პირზე ძესწყდა და განმეორდა ძველის-ძველი ამბავი—მოგზაურობა „აკაზინით“. თუ დიდი მაშველი რაზმი არ ახლდა ზარბაზნით მგზავრებს, ვერავინ ბედაცდა ფეხი გაედგა ერთის ქალაქიდან მეორე ქალაქამდე, ან წასულიყო ვინმე ჩვენიდან რუსეთს, ან დაბრუნებულიყო იქიდან საჩვენოში.

რანაირად გათამამდნენ შამილის რაზმები, სჩანს მოზღოკის აკლებიდან. 1840 წელს, 29 ენკენისთვეს ახვერდი-მაგომას დასი დაეცა ქ. მოზღოკს, სადაც ბლომად სცხოვრობდნენ მეთვრამეტე საუკუნეს მისული ქართველები და სომხები. მაგომამ მოზღოკი ააწიოკა და ტყვენი წამოასხა, მათ შორის სომეხ ვაჟარ ულუხანოვის მთელი სახლობა. ტყვედ ჩაუვარდა მაგომას ულუხანო-

ვის ქალი ანა, რომელიც შამილმა ცოლად შეირთო და უწოდა სახელად შუანეტი. შუანეტი შამილის უსაყვარლეს ცოლად შეიქმნა და ეტყობა ანასაც დიდად შეუყვარდა შამილი, რადგან თავისუფლებაზე უარი სთქვა და აღარ დაბრუნდა მამის ოჯახში, ოდეს თ. ბარიათინსკიმ ტყვე შამილი პეტერბურგს გაისტუმრა და ანას გამოუცხადა, სრული უფლება გაქვს მამის სახლში დაბრუნდეთ. შუანეტამ ამჯობინა ტყვე გმირთან დარჩენა ქ. კალუგაში მოზლოკში დაბრუნებას, ვაჟარ ულუხანაოვის ოჯახში.

ამ ხანებშივე შამილმა აირჩია ბინად სოფელი დარგო იჩკერიისა მდინარე აქსაის სათავეში. იჩკერია იმ დროს განთქმული იყო გაუვალ, უღრან და დაბურულ ტყეებით. აი სწორედ აქ, სოფელ დარგოს, იჩკერიის ტყეებში, დატრიალიდა 1845 წ. ის დრამა, რომელმაც, ცოტა გაწყდა, კინალამ არ იმსხვერპლა გრაფი მ. ს. ვარანცოვი, სარდალი რუსის მხედრობისა და მოადგილე რუსის იმპერატორ ნიკოლოზ პირველისა კავკასიაში.

სოფელი დარგო და იჩკერის ტყე შავ სამარედ გადაექცა რუსის მხედრობას. 1845 წელს რომ გრაფმა ვარანცოვმა კინალამ თავი დაიღუპა, სამის წლის წინად, 1842 წელს, გენერალ-ადიუტანტმა გრაბბემ ისეთი სირცხვილი სჭამა, რომ ამის მზგავსი რუსებს არა ენახათ რა იმ დროიდან, რაც რუსის მართვა-გამგეობა დამკვიდრდა საქართველოში. ვის მოუვიდოდა აზრად, რომ გამარჯვებას ჩვეული ჯარი ისე დამარცხდებოდა და შერცხვებოდა, როგორც ეს გრაბბეს დაემართა დარგოში, მაგრამ მოულოდნელი მოხდა. ისტორიკოსი ესაძე ასე გვიამბობს ამ ამბავს, რომელსაც გულ-მტკივნეულად იხსენიებს და ამბობს, რომ იგი ამბავი შავ ლაქად დარჩება სამუდამოდ რუს და მთიულთა განუწყვეტელ ომიანობის მატრიანეშია.

გენერალი გრაბბე დაიძრა სოფელ ვერზელიდან 30 მაისს 1842 წელს და გაემართა დარგოსაკენ იჩკერიის

ტყით. თან ახლდა სარდალს ძლიერი რაზმი, რიცხვით 10.000 ჯარის კაცი. გრაბბე ჰფიქრობდა ერთის შეტევით შამილს თავ-ზარს დაეცემ, სამუდამოდ ბოლოს მოვუღებ და იმის ბუდე (რეზიდენცია) — დარგოსაც დავაქცევო. ვინ იცის იქნება თამამ გენერალს იმის იმედიც თუ ჰქონდა, რომ ამ დროს შამილი იჩქერიაში არ ეგულებოდა.

მართლაც 1842 წელს, მაისის მიწურულებში, შამილი იჩქერიაში არ იყო. 25 მაისს იგი შეიქრა ყაზიყუმუხში 15.000 მეომრით. დიდი ხანია შამილი ამრეზილი იყო ყაზიყუმუხზე და უნდოდა ჰკუთნებოდა ესწავლებინა აქ დაბანაკებულ რუსის ჯარისა და ამ ჯარის უფროს მ. ზ. არლუთაშვილ-მხარგრძელისთვის და აგრედვე ყაზიყუმუხელებისთვის, რომელნიც აგრე რიგად თავს არ უკრავდნენ შამილს, აღმაცერად უყურებდნენ მის ბატონობას მთაში და სულ განზე იყურებოდნენ.

ყაზიყუმუხი მოსამზღვრეა ქარ-ბელაქნისა, ზაქათლისა და ელისეს სასულთნოსი და მდებარეობს ორ ყოისუს შუა, ერთია შავი ყოისუ და მეორე ყაზიყუმუხისა. სიგიჟე იყო შამილის მხრივ დარგოდან ყაზიყუმუხში შექრა სწორედ იმ დროს, როდესაც ჩრდილოეთიდან გენერალი გრაბბე ემზადებოდა იჩქერიისა და დარგოს აკლემასა, მაგრამ განა მარტო ყაზიყუმუხის ლაშქრობაა სიგიჟე და უზომო სითამამე? მთელი ცხოვრება შამილისა, მოქალაქობა მისი და დაუსრულებელი ბრძოლა უშველებელ, ევროპულ და სამხედრო სახელმწიფოსთან რა-ჯარის თუ არ სიგიჟე, სითამამე და დაუჯერებელი ამბავ-არაკი? ამის გამო გასაოცარი და მოულოდნელი არაა ეს გალაშქრება და თავდასხმა ყაზიყუმუხზე, ოდეს ზურგიდან გრაბბე ემუქრებოდა. შამილს შეურყეველი იმედი ექნებოდა თავის შამაც და ერთგულ ნაიბებისა. ისინი უშამილობას არ შეიმჩნევენდნენ და საკადრის პასუხს გასცემდნენ გენერალ გრაბბეს და არ გააწილებდნენ იმამის სახელს. არც ესაძე და არც ბიოგრაფი შამილისა ბ-ნი მ. ბ. არ გვეუბნებიან, თუ ვინ დასტოვა

შამილმა იჩქერიაში, თვითონ რომ ყაზიყუმუხისკენ გაემართა, მაგრამ საფიქრებელია, რომ შამილის მაგიერობას გასწევდა ჰაჯი-მურატი, ან ახვერდი-მაგომა, ან შეიძლება ორთავენი.

ყაზიყუმუხის რუსის რაზს უფროსობდა ნიკიერი და მამაცი სარდალი მოსე ზაქარიას ძე არღუთაშვილი-მხარგრძელი. შემოსეულს შამილს არ შეუშინდა არღუთაშვილი და უკან დახევას და ძალის მოკრეფას ამჯობინა წინ მიჰგებებოდა იმ მხედრობით, რაც ხელთქვევით ჰყავდა იმ ხანად. მტერნი დაუპირდაპირდნენ ერთმანეთს სოფელ კიულიულისთან. მოპირდაპირეთა ბანაკს ჰყოფდა ღრმა ხევში ჩაყარდნილი მდინარე ყოისუ, მყვირალა და ღრიალა, როგორც ჩვენი თერგი და არაგვი, ილია ქავქავაძისა და ნიკოლოზ ბარათაშვილისაგან შემკულნი და ვაპატოსნებულნი.

თავად არღუთაშვილს ჰყავდა მხოლოდ სამ-ნახევარი ბატალიონი და 1160 მილიციონერი ოთხის ზარბაზნით. სამწუხაროდ, ცნობა არა გვაქვს ამ ჟამად, ვინ იყვნენ ეს მილიციონერები, თუმცა ეჭვი არა გვაქვს, რომ ნახევარზე მეტი ქართველობა იქნებოდა და მათ შორის ალბად თუშობა, ეს დაუძინებელი მტერი დაღესტნისა. რაც პატარა თუშეთმა ძალ-ღონე შეაღია დაღესტანს, რაც აქ წმინდა სისხლი დაღვარა, სხვაგან სადმე რომ დაეხარჯა მაგოდენი ძალა და დაეღვარა მაგოდენი სისხლი, ერთს პატარა სამეფოს მოუპოვებდა საქართველოს და ფეშქაშად მიართმევდა. ღვთის წინაშე არც თვითონ იქნებოდა წაგებაში და დღევანდელსავით აღარ ექნებოდა საქმე ბარი და სავაგლახო ადგილ-საძოვარი.

რაკი პირდაპირ დაკვრა არ შეიძლებოდა მტრისა ღრმა ხევის გამო, შამილმა მოუარა რუსის ბანაკს და შეუტია ორთავ გვერდიდან, ან როგორც ევროპელები და რუსები ამბობენ, ფლანგებიდან. გაჩაღდა ბრძოლა სასტიკი, უღმობელი და მძაფრი. ჩვენის ქვეყნის შვილნი, მთიელი შამილი და ბარელი არღუთაშვილი ერთმანეთს აღარ ზოგავდნენ. გაიმარჯვა ბარელმა, მხნე და

ნიჭიერმა არღუთაშვილმა. დამარცხებული შამილი გავიდა ყოსუს მეორე ნაპირს და სულაც დასტოვა ყაზიყუმუხი.

ბრძოლა იყო 2 ივნისს და რადგან შამილს აცნობეს, რომ ჩრდილოეთიდან გენერალი გრაბბე შემოესია იჩკერიასო, სისწრაფით გაეშურა დარგოს, სადაც სამ დღეს, 30 და 31 მაისს და 1 ივნისს უმაგალითოდ დაემარცხებინათ. შამილის ნაიბებს გენერალი გრაბბე. შამილმა ისეთი სწრაფი სიარული იცოდა, რომ ხშირი დღეში 70 კერსი გაუვლია რაზმით.

ახლა დაუბრუნდეთ იჩკერიის ტყეს და ვნახოთ, რა დაემართა თამამ გენერალ გრაბბეს.

გენერალ-ადიუტანტი გრაბბე დაიძრა სოფელ გერზელიდან 30 მაისს 1842 წელს. *; როგორც ზემოდ მოვიხსენიეთ, რაზმი მრავალრიცხოვანი იყო, სულ 10.000 ჯარის-კაცი. ამოდენა რაზმის ტრიალი და მოძრაობა მთაგორიან, კლდიან და უგზოუკვლო ქვეყანაში და იჩკერიის დაბურულ ტყეებში მეტის-მეტად სახიფათო იყო, მაგრამ გენერალი გრაბბე ისე შეიპყრო სურვილმა დაენგრია ერთის დაკვრით შამილის საცხოვრებელი ბინა— დარგო, რომ აღარავის ჩჩევა-დარიგებას აღარ ისმენდა. გრაბბეს რაზმის პოლკოვნიკი, მთიული, ხასაიმუსაევი აფრთხილებდა გრაბბეს, დიდად სახიფათოა შესვლა ამოდენა რაზმით შუაგულ ავარიაშია. თითქმის მტკიცედ და გადაჭრით ეუბნებოდა მუსაევი გენერალს, რაზმი დაილუპებებაო, მაგრამ არა გამოვიდა რა. გრაბბემ არ შეისმინა ვონიერი ჩჩევა მთიულისა, რომელმაც ზედმიწევნით იცოდა მთა, მთის ხასიათი და ისა, თუ როგორ უნდა ლაშქრობა მთა-გორიან ქვეყანაში.

რაზმი გაება იჩკერიის უღრან და დაბურულ ტყეებში და ქიაყელასავით გაიჟიმა. სურსათისა და ბარგის ურმები ისე აბრკოლებდა და აფერხებდა რაზმის მოძრა-

*) ს. გერზელი (სიმაგრე) სძევს სიმაგრე ხასაე-იურტიდან დასავლეთით, ესე 12—15 ვერსით.

ობას, რომ სწორედ ხაფანგობას უწევდა რუსის მხედრობას. მთიულებსაც სწორედ ეს უნდოდათ. დაბლის ძაფსავეთ გაკიმულ რუსის რაზმს მთიულებმა დაუშინეს ტყვია და წვიმასავეთ მიაყარეს თავსა და პირში. ტყის ყოველი მხრიდან სიკვდილის სუნთქვა უბერავდა. რუსის მხედარი ვერა ჰხედავდა, საიდან მოდის ტყვია, ვინ ისევრის, ისმოდა მხოლოდ მწარე ზუზუნნი, თითქოს ფუტკარს უყრიაო. ჯარი სულით ეცემოდა და ნელ-ნელა ჰკარგავდა ჯარის უმთავრეს თვისებას—სიმბნევეს, სითამამეს, გამირობა-ვაეკაცობას. შედრკა და გატყდა ჯარი.

წინ იწევდა ჯარი, მაგრამ რა, უარესი წინა ხედვბოდა. ასე გაშინჯეთ მთელი ორი დღე ტრიალეზა რუსის მხედრობა ამ გაეარვარებულ თონეში და ცვარი წყალი ვერ ეშოვნა, რომ ყელი ჩაესველებინა და შუბლი და გულ-მკერდი გაეგრილებინა. ნაბიჯს ისე ვერ გადასდგამდნენ რუსები, რომ წინ ხერგი არ დახვედროდათ. მაწასადამე ვიდრე ხერგს არ გასწმენდნენ და ფიჩხსა და ხეებს არ მიჰყრიდ-მოჰყრიდნენ, წინ ვერ წაიწევდნენ. ასეთ შეტბორების დროს უღმობელად და შეუბრალებლად წყდებოდა რუსობა. თვით მთიულნი თავზე ხელალებით იბრძოდნენ, მტერს რომ არა ზოგავდნენ, თავიანთ თავსაც აღარ უფრთხილდებოდნენ. თითქოს შეზარხოშებულან მოსეულ მტრის სისხლითაო, მოიდან მოხვეტილ ზვავეით ეზვავებოდნენ რუსებს და მედგრად იცავდნენ თვის ტერრიტორიის თვითოეულ ნაბიჯს. შარბათივით ტკბილია მთიულისთვის სამშობლო მიწა-წყალი და აკი თავს არ ზოგავდნენ მთის არწივის ბარტყები.

გენერალი გრაბბე და მისი რაზმი იმის მეცადინეობაში იყო, რომ ჩახერგილი გზა როგორმე გაეხსნა და ხერგებიდან მთიულები გაერეკა. ერთს ხერგს ისეთის გამირობით იცავდა მოლა შუაიბი, რომ სწორედ საოცარი იყო. მთელი ავანგარდის-მოწინავე რაზმის აფიცრობა ან გასწყვიტა შუაიბმა, ან დაჰკოდა. ყაბარდოს პოლკის პირველ ბატალიონის კამანდირი პოდპოლკოვნიკი ოსტროვსკი აქვე მოჰკლეს.

სამის დღის განმავლობაში გრაბბემ ძლივ-ძლივობით 25 ვერსი გაიარა და რაკი დარწმუნდა, რომ წინსვლა შეუძლებელია და შეიძლება მთელი რაზმიც დაჰლუპოს, ბრძანება გასცა 2 ივნისს, უკან დაებრუნდეთო. ჯარი იმავე გზით ბრუნდებოდა შინ, რომლითაც ამოვიდა იჩკერიაში.

გამოტრიალებულ ჯარს უფრო გაუძნელდა გზის გაკაფვა, ვიდრე წინ სიარული. არეულ და შერყეულ მხედრობას ექვსი ზარბაზანი წაართვეს მთიულებმა. ესეთი სირცხვილი და ფაფის მოჭრა ვერ აიტანა პოდპოლკოვნიკმა პრასკინმა, ეკვეთა ჩაჩნებს და ხუთი ზარბაზანი უკანვე დაიბრუნა. ძვირად კი დაუჯდა პრასკინს ეს თავის გამეტება. რამდენიმე ტყვიამ გული გაუგმირა პრასკინს და იქვე ზარბაზნებთან სული ჩააბარა უფალს.

ენით არ აიწერება აშლილ-დაბნეულ ჯარის უკან დაბრუნებაო, ბრძანებს ისტორიკოსი ესაძე. ტყე გაივსო დახოცილთა გვამებით, კვნესა და გმინვა დაკოდილთა და დაქრილთა გულ-საკლავად მოეფინა იჩკერიის ტყის არემარესაო.

როგორც იყო დაბრუნდა გრაბბეს რაზმი 4 ივნისს ს. გერზელს, მაგრამ ვაი ამ დაბრუნებას. 1700 ჯარისკაცი იმსხვერპლა ამ უმაგალითო ლაშქრობამ. 66 აფიკერი დააკლდა რაზმს, ზოგი დახოცილი და ზოგიც დაკოდილი. შამილის ბიოგრაფის სიტყვით ზარალი გრაბბესი უწევდა 1800 კაცს.

გენერალ-ადიუტანტ გრაბბეს უმაგალითო დამარცხებამ და გაწბილებამ დიდი სახელი შესძინა შამილს. მაშ რალა ყოფილა რუსის ძლიერება, თუ კი სამის დღის განმავლობაში შეიძლება მისი ხოცვა და ელექტა ყვერულებივით, ამბობდა გაოცებული და გახარებული მთა. გულში ნათესი ეფინებოდა მთიულს და უძლიერდებოდა იმედი, ეგები ღმერთმა ინებოს და სავსებით გავრეკოთ „დონლუზები“, ველ მანდორს და ანკარა წყაროებს რომ სწუმპავენ, ეგები მოგვხედოს უფალმა და

მოვიშორათ საბელი, რუსის მთავრობა და ერი რომ მაგრად სკიმავენ ყაზახთა სტანიცების გამართვით და საცხოვრებელ ადგილების ჩამორთმევით.

მთელი ათი წელიწადი (1832—1842) იბრძოდა რუსეთი, აუარებელი ჯარის კაცი შეაკლა პირქუშ მთას, აუარებელი ფული დახარჯა, დიდი ზნეობრივი ძალა და ენერგია შეაღია მთიელებთან ბრძოლას, და დახე ბედსა, რალაც საძის დღის განმავლობაში დაჰკაზგა ყველაფერი და ხელსა რიელი დარჩა, აღარც სახელი უძლეველობისა და აღარც ნაყოფი მედგარის შრომისა.

ხოლო სახელი და დიდება შამილისა გაბრწყინდა და გაცისკროვნდა, გენიოსობა იმამისა გაიფურჩქნა და გაიშალა. მდინარე ყუბანს უწია შამილის დიდების ხმამ და აუტოკა გული ყაბარდოს და ოვსეთს.

ყუბანი რა, თვით ოსმალეთს უწია შამილის გამარჯვების ხმამ. ოცნებით იქ უფრო ოცნებობდნენ და იღვივებდნენ იმედს რუსეთის საბოლოოდ დაპარცებისას და კავკასიის ქედიდან მოშორებისას.

IV

თავადი ვარანცოვი და დარგო.

ფიცხის გულის პატრონს იმპერატორ ნიკოლოზ პირველს სწორედ გული გაუწვირილდა შამილთან დაუსრულებელის ომით და ბრძოლით. ნუ თუ ერთის დაკვრითა და რიხიანის შეტევით არ შეიძლება შამილის განადგურებაო, ჰფიქრობდა იმპერატორი. ველარ აიტანა ასეთი გაჭიანურება ომისა და თვითონ შეუდგა საომარ გეგმის შედგენას. კავკასიის ახლად დანიშნულ თვის მოადგილეს გრაფ მ. ს. ვარანცოვს ასეთი ბრძანება გადასცა: „რამდენადაც მოსახერხებელია, ეცადე რომ დაამარცხო ბრბონი შამილისანი; შედი შამილის სამფლობელოს შუაგულში, გამაგრდი იქ და დამკვიდრდიო“.

მოგეხსენებათ, რომ ბრძანების გაღება ძნელი საქმე არ არის, მერმე ისიც ორი ათას ვერსის მანძილიდან. საომარი გეგმა, პეტერბურგს დაწერილი, სრულიად შეუფე-

რებელი აღმოჩნდა ადგილობრივ ვითარებისა. მართლაც მისმა განხორციელებამ კინალამ არ ინაცვალა მოხუცებული სარდალი ვარანცოვი და მასთან ერთად მთელი რუსის მხედრობა.

გრაფ ვარანცოვს სახელი ჰქონდა განთქმული, როგორც ნიჟიერ სარდალს და შესანიშნავ სამოქალაქო მოღვაწეს. ამ კვიან ადამიანს როგორ გამოეპარებოდა, რომ იმპერატორის გეგმის შესრულება უგუნურობა იყო, მაგრამ ვერ გაბედა უარი ეთქვა ხელმწიფისათვის—ვერ ვიკისრებ თქვენს მოადგილეობას კავკასიაში და თქვენის გეგმის შესრულებასაო. ისიც კარგად იცოდა ვარანცოვმა, რომ შამილის სამფლობელოს არც შუაგული ჰქონდა და არც ნაპირები. არწიყი იმის არწივია, რომ ერთს განსაზღვრულ ადგილს არა ჩერდება და სადაც მოიპრიანებს, იქ დაიბუდებს ხოლმე. მისი სამეფო და სამფლობელო ცის სივრცეა და აბა ასეთს სამეფოს ვინ მოუნახავს ან შუაგულს, ან ნაპირებს. შამილის სამფლობელო ხან ავარია იყო, ხან საჩაჩნო.

რაკი იკისრა გრაფ ვარანცოვმა იმპერატორ ნიკოლოზ პირველის გეგმის აღსრულებაში მოყვანა, რაღა გაეწყობოდა, ავი იყო იგი, თუ კარგი, საჭირო იყო სამზადისი და მომზადება. 1845 წლის გაზაფხულის პირვე ვარანცოვის ბრძანებით შეიკრიფა ხუთი ცალ-ცალკე რაზმი; საჩაჩნო-გენერალ ლიდერსისა, დაღესტნისა-თავად ვ. ო. ბებუთაშვილისა, სამურისა—თ. მ. ზ. არღუთაშვილ-მხარგრძელისა, საღეყო-გენერალ შვარცისა და ნაზრანისა-გენერალ ნესტეროვისა. ხუთივე რაზმს ერთს დროს უნდა დაეწყო მოქმედობა შამილის ასაკლებად და ბოლოს მოსაღებად.

ანღიაში უნდა შეკრილიყვნენ ვარანცოვის ბრძანებით რაზმები გენერალ ლიდერსისა და თ. ბებუთაშვილისა. ლიდერსის საჩაჩნო რაზმში მოჰყვა დიდ ძალი ქართველობა, სახელდობრ ორი დრუჟინა ქართველ ქვეითა მილიციონერებისა, სულ 1000 კაცი და ხუთი ასეული ქართველ ცხენოსან მილიციისა. მაშასადამე მარტო

ლიდერის რაზმში 1500 ქართველი მეომარი იღებდა მონაწილეობას. როგორც ეტყობა, არც თუ ქართველებს დაუჯდათ იაფად დარგოს ექსპედიცია, ანუ ლაშქრობა.

31 მაისს 1843 წ. გრაფი ვარანცოვი აბძანდა ტფილისიდან ციხე-სიმაგრე ვნეზაპნოეში, სადაც ბანაკად იდგა გენერალ ლიდერის საჩაჩნო რაზმი. სამხედრო სალამქალამის დასრულების შემდეგ რაზმმა გადაახდევინა ჩვეულებრივი პარაკლისი და გაემართა საბრძოლველად. მთიბათვეს გენერალი ლიდერსი შეუერთდა გენერალ ბებუთაშვილის დაღესტნის რაზმს.

შამილს აბა როგორ გამოეპარებოდა რუსების მოძრაობა და ისიც შეუდგა სამზადისს. ანღიაში შესასვლელი გზები შეჰკრა მხოლოდ პატარ-პატარა რაზმებით. გეგმა შამილისა ის იყო, რომ შეეტყუებინა რუსები ანდიის შუაგულში, ჩაეკეტნა იქ და სრულებით გაეწყვიტნა, ან ისე დაემარცხებინა, რომ კარგა ხანს ფიქრად აღარ მოსვლოდათ თავხედურის ლაშქრობის დაწყება. რაკი ასეთი გეგმა მიიღო შამილმა, ცხადია რომ არავითარ დაბრკოლებას არ გაუჩენდა ლიდერისა და ბებუთაშვილის რაზმებს სალათავიაში და დასტოვა უბრძოლველად ბარტუნაი, რომელიც ითვლებოდა სალათავიის კარად.

სალათავიას გვერდზე აკრავს გუმბეთი, რომელზედაც გადადის ორი გზა ბარტუნაიდან, ანუ სალათავიის კარიდან. ერთი გზა ადის კირკის უღელტეხილზე და ეშვება ძირს, ხოლო მეორე გადადის მიჩიკალზე. რუსებმა არჩიეს კირკის უღელტეხილი. თვით გრაფ ვარანცოვმა მოისურვა თავის თვალთ ენახა კირკის უღელტეხილი და დაეთვალთვლებინა იგი. 5 ივნისს მოწინავე რაზმი შეუდგა უღელტეხილს. რაზმს მისდევდა მთავარ-სარდალი ვარანცოვი, ხოლო უფროსობდა ავანგარდს მამაცი გენერალი პასსეკი.

მთელი გუმბეთი სუფრასავით წინ გადაეშალა რუსის მხედრობას, კირკის უღელტეხილზე რომ ავიდა. მომავალ ბრძოლის ველი აშკარად სჩანდა. აქ, ამ უტყეო

და უჩირგვო ხრიოკიან ველ-მინდორზე უნდა გადაწყვეტილიყო ბედი შამილისა.

პირდაპირ რუსის ჯარისა შამილმა დარაზმმა თვისი მხედრობა ანჩიმერის მთაზე. ანჩიმერი ანდიის შუაგული არაა და ვგონებთ, რომ შამილის აქ გაჩერება თვალთმაქცობა იყო და მტერს თვალებს უბნელედა.

იერიშით აიღეთ ანჩიმერია, უბრძანა გრაფ ვარან-ცოვმა გენერალ პასსეკის აფანგარდს.

კირკის უღელტეხილიდან ძირს დაეშვა გენერალ ბენკენდორფის უფროსობით რაზმი. ჯარის-კაცი თხემსავით ხტოდნენ კლდიდან კლდეებზედ, ხოლო თ. ლევან მელიქიშვილის ქართველთა მილიცია თულებივით მიიპარებოდა ძირობებში და ამ რიგად მთელი მოწინავე რაზმი უვნებლად მიაღდა ანჩიმერის მთის ძირსა.

ქართველი მილიციონერები პირველნი აცოცდნენ ციცაბო კლდეზე. მილიციონერებს ფეხდაფეხ მისდევდა რუსის მხედრობა. გულადად დაუხვდა მტერი იერიშის მომტანთ და დააყარა ზემოდან ლოდები, ყუმბარები და ტყვია, მაგრამ არ შედრკნენ მელიქიშვილის ქართველები და გალომებული წინ მიიწევდნენ. ისე გახურდნენ თურმე ვაჟკაცი, რომ აღარ მოუცადეს უკანა ჯარს და გიჟებსავით მიესივნენ ლეკებს. გაჩაღდა ხელ-ჩართული, ხმლისა და ხანჯლის ტრიალი. მალე წამოეწივნენ ქართველებს რუსებიც და ახლა ამათაც დაატრიალეს ხიშტები. გაიმართა ულმობელი ხოცვა-ჟლეტა ანჩიმერიკ მთის მწვერვალზე; უსულო ლოდნი და კლდენი უხვად შეიღება წითლად ადაპიანის სისხლით.

გრაფი ვარანცოვი დურბინდით უყურებდა კირკის უღელტეხილიდან ამ პირველ ბრძოლას და გული სიამოვნებით ევსებოდა, გამარჯვების ნიშნებს რომ ატყობდა.

შამილმა დასცალა ანჩიმერის მწვერვალნი და გარდაიხვეწა გუმბეთიდან.

გამარჯვებით დასრულდა პირველი შეტაკება რუსებისა შამილის მხედრობასთან, მაგრამ აქვე იჩინა თავი მომავალ უბედურობისა და ტანჯვა-მწუხარების ნიშნებმა.

ისეთი ამინდი დაიჭირა, რომ ძალლი გარედ არ გაიგდებოდა. წვიმა კოკის პირულად მოვიდა, აცივდა საშინლად. გზები სულ ერთიან გაფუქდა. აბა კარგ ამინდში რაა მთებში გზა და რა დაემართებოდა ერთი კვირის განუწყვეტელ წვიმის შემდეგ! უტყუარ გუშბეთში შეშის ნასახი არსად იყო, ასე რომ ჯარის-კაცები ცხელ საქმელს დანატრულდნენ. ყველაზე დიდად ის აწუხებდა მეომარს, რომ არ იცოდა, როგორ გაეშრო დასველებული ტანისამოსი.

ასე ვაი-ვაგლახით და მწუხარებით გაატარა ჯარმა გუმბეთში მთელი ერთი კვირა.

11 ივნისს აიყარა ბანაკიდან და გაემართა ანდიისაკენ ბუკურის უღელტეხილით, რომელსაც უწოდებენ ანდიის კარს.

შამილმა არ მოისურვა არც ანდიის კარის დაკეტვა და მის წინ ბრძოლა. დასცალა ეს მაგარი პოზიცია და მოშორდა ბუკურს, ხოლო გასცა ბრძანება, ცეცხლი წაუკიდეთ ანდიის სოფლებსაო.

14 ივნისს რუსის ჯარი ავიდა ბუკურის უღელტეხილზე და იხილა საშინელი სურათი. მთელი ანდია, მთანი და ხეობანი კვამლითა და ჯანყით იყო მოცული. ხეობათა და წყლის პირებზე გაშენებული სოფლები იწვოდა და ინგრეოდა გაონავრებულ ცეცხლის აღში.

საკუთარის ხელით საკუთარის ქონების გაქრობა-განადგურება — ეს ხომ უშველებელი მსხვერპლია სამშობლოს წინაშე, მაგრამ თავს რომ არ იზოგავდა შამილი, განა ქონებას გაუბრთხილდებოდა!

ანდიის უმთავრესი სოფელი ანდიც შთანთქა ცეცხლმა. შამილმა არც ეს სოფელი დაინდო და ცეცხლი მისცა. პირველად გადამწვარ და გადაბუგულ ანდში შეიჭრნენ ქართველები, სადაც ლეკები ჩასაფრებულიყვნენ. რაკი ხელ-ჩართული ომი გაიმართა ლეკთა და ქართველთა შორის, ქართველების საშველად დაიძრა თ. ა. ი. ბარიათინსკი, შემდეგ იმპერატორის მოადგილედ რომ იყო კავკასიაში და რომელმაც გუნიბზედ დაატყვევა შა-

მილი. ქართველები და ბარიათინსკის ეგერები აცოცდნენ ანდის კლდეებზე და სალამომდის აკედებოდნენ ლეკებს. ველარ გაუძლეს მთიელებმა გაათრებულ ქართველებს და ეგერებს, დაიხიეს უკან და დაუთმეს მოზვავებულ მტერს ბრძოლის ველი. რუსის მხედრობამ დაიჭირა ს. ანდი 14 ივნისს. სოფლის სარდაფებში რუსებმა იპოვნეს 400 დამალული ყუმბარა, რომლის წაღება, ან აფეთქება ველარ მოესწროთ შამილის მეომრებს.

სოფელ ანდის დაჭერით დასრულდა რუსების გამარჯვებით წინსვლელობა შამილის სამფლობელოს შუაგულისაკენ და იწყობა ხიფათი და ფათერაკი. უპირველესი დაბრკოლება ის იყო, რომ სურსათი საკმაოდ არ მისდიოდა ჯარს. ეს იყო მიზეზი, რომ გრაფი ვარანცოვი 6 ივლისამდე გაჩერდა გადამწვარ სოფელ ანდში, სადაც არაფერი არ იშოვებოდა. განა მარტო ანდში, მთელ ანდიაში ათის კაცის გამოსაკვებ სურსათს ვერ მოაგროვებდა ადამიანი.

6 ივლისს რუსის მხედრობა აიყარა ანდის ბანაკიდან და დაადგა დარგოს გზას. ვარანცოვს ამ დროს ახლდა 8000 ქვეითა ჯარის კაცი, 120¹¹ ცხენოსანი და 22 ზარბაზანი. ამოდენა მხედრობა არას დროს არ შესულა დაღესტანში. რომ უფრო ადვილად წარმოიდგინოს მკითხველმა ჯარის მარშრუტი, საჭიროდ მიგვაჩნია მოვიხსენიოთ, რომ ციხე-სიმაგრიდან „ენეზაპნოე“ სოფელ ანდამდე პირდაპირის გზით, რუსებმა რომ გაიარეს, იქნება 6¹² ვერსამდე, ჩრდილოეთიდან სამხრეთამდე. ანდიდან ჯარი გამობრუნდა ისევ ჩრდილოეთისკენ და გაემართა დარგოსკენ. დარგომდე უნდა ვიანგარიშოთ ესე 20 ვერსი, ხოლო დარგოდგან გერზელის სოფლამდე ესე 40 ვერსი. მაშასადამე გრაფ ვარანცოვის რაზმმა ჩრდილოეთიდან სამხრეთისკენ წაიწია სამოც ვერსზე, ხოლო ანდიდან პირი იბრუნა და დაბრუნდა გერზელში. 1842 წელს დამარცხებული გენერალი გრაბბეც ამავე გზით დაბრუნდა გერზელში.

ს. ანდიდან რუსებმა გაიარეს 14 ვერსი დარგოსა-

კენ და გაჩერდნენ უღელტეხილზე, საიდანაც იწყობოდა ღრმა და ტყით დაბურული ხეობა. დარგოსა და უღელტეხილ შორის ეს ტყიანი და ღრმა ხევი სძევს.

უკანასკნელ უღელტეხილიდან, სადაც რუსები ავიდნენ ნ ივლისს, მოსჩანდა უღრანი, დაბურული ტყე და ტყის შუაგულში პატარა ველ-მინდორი. აქ, ამ ველ-მინდორზედ შამილს თვისი ბანაკი დაეცა.

სამხედრო და საომარი გეგმა იმპერატორ ნიკოლოზ პირველისა და შამილისა სისრულეში იქმნა მოყვანილი: გრაფი ვარანცოვი ჯარით შამილის სამფლობელოს შუაგულში შევიდა, ხოლო შანილმა რუსები შეიტყუა იქ, სადაც უნდოდა.

გრაფ ვარანცოვს თან ახლდა ბრწყინვალე ახალგაზრდობა, რომელიც სახელისა და დიდების მოსახვეჭად დაიძრა პეტერბურგიდან შამილთან საბრძოლველად. ფუფუნებაში აღზრდილნი ლაშქრობას ისე უცქეროდნენ, როგორც სასიამოვნო გასეირნებას და სრულიადაც არ მოელოდნენ, რომ გაქირვებას იხილავდნენ კავკასიის მთებში. ცოდნით მარტო ის იცოდნენ ამ ქვეყნისა — რომ ლერმონტოვმა და პუშკინმა შეამკეს კავკასიის მთანი მშვენიერის ლექსებით.

აი სწორედ ამ ბრწყინვალე ახალგაზრდობამ აღარ მოუცადა საერთო იერიშის ნიშანს და ბატონიშვილ ალექსანდრე გესსენელის მეთაურობით მოჰქუსლა შამილის ბანაკისკენ, შეიჭრა ცხენ და ცხენ ერთ ხერგზე და მისვლის უმაღ აიღო იგი.

მამაცმა და ვაჟაკ-ურმა შეტევამ და მისევამ მტერზე დიდად გაამხნევა რუსის მხედრობა. გენერალი ბელიავესკიც დაიძრა ლიტვის ბატალიონით და ქართველთა მილიციონერებით ბრძოლის ველისკენ. ღიმილითა და ოხუნჯობით შევიდა რუსის მხედრობა დაბურულსა, ხშირსა და ჩამობნელებულ ტყეში. გამხიარულებული მხედრობა ჩინჩვარსავეთ ამტვრევდა მტრის ხერგებს და დაუბრკოლებლივ წინ მიიწევდა.

კარგ გუნებაზე მოსულ რუსის ჯარის წინ გადიშა-

ლა მშვენიერი არგუნის ხეობა, უცნაურად განათებული
შებინდებისას. ნათელი დარგოდან მოდიოდა. სატახტო
და საიმამო ბინაც არ დაინდო შამილმა და ცეცხლი წაუ-
კიდა დარგოს.

რუსის მხედრობას მაინც და მაინც იაფად არ დას-
ჯდომია ხერგებისა ზედიზედ ალება და გამარჯვებით წინ
სვლა. მტერმა სასიკვდილოთ დაუქრა გენერალი ფოკი.
გრაფ ვორონცოვის ახალგაზდა ადიუტანტს დონდუ-
კოვ-კორსაკოვს ფეხში მოარტყეს ტყვია *

დარგოს ასაღებად გრაფმა ვარანცოვმა გაგზავნა
გენერალი ბელიავსკი ორის პატალიონით და ორის ქარ-
თველთა დრუჟინით. ცეცხლ-მოკიდებული დარგო რუსებ-
მა და ქართველებმა ადვილად აიღეს. დანარჩენი რუსის
მხედრობა დარგოს ავიდა იმავე საღამოს და დაბინავდა
მის გარემო.

ამ გვარად გრაფმა ვარანცოვმა დაიპყრო შამილის
სატახტო ბინა დარგო და მაშასადამე სავსებით შეასრუ-
ლა იმპერატორ ნიკოლოზ პირველის ბრძანება. შამილის
სადგომი სახლი, მეჩეთი, თოფხანა და ზოგი სხვა შენო-
ბა ცეცხლის აღმა შთანთქა. ვარანცოვს ისღა დარჩე-
ნოდა, რომ სამშვიდობოში დაბრუნებულიყო საცერომო-
ნო მარშით.

მაგრამ ბედმა სულ სხვა იწება. რუსებმა რომ თვი-
სი საომარი გეგმა შეასრულეს, ჯერი ახლა შამილის გეგ-
მის ასრულებაზე მიდგა.

წინასწარ დამარცხების შემდეგ შამილს თავი ისე
ეპირა, თითქოს გამარჯვებული იგია და არა გრაფი ვა-
რანცოვიო. სულის დაცემისა ნიშანიც არ ემჩნეოდა
მთის არწივს. ომი ახლა იწყობაო, ეუბნებოდა შამილი
თავისიანებს და მახლობელთ, ვნახოთ რუსები როგორ
გაიტანენ თავიანთ ძვლებს იჩკერიის ტყეებიდანო. თითქოს

*) ეს ის დონდუკოვ-კორსაკოვია, რომელიც დიდის მთავარ
მიხეილ ნიკოლოზის ძის შემდეგ მთავარ-მართებლად იყო საქარ-
თველოში.

არაფერი მომხდარაო, თითქოს დარგო ძეგლებურად ხელუხლებელია, ისე არხეინად ეჭირა თავი შამილსა. რუსების თვალ წინ შამილი სწვრთნიდა რუსთა გამოქცეულ სალდათებისაგან შემდგარ ბატალიონს და საცერემონიო მარშით აატარ-ჩაატარებდა ხოლომე ამ ბატალიონს.

დარგო ხომ რუსის მხედრობამ დაიჭირა და დაბანაკდა, მაგრამ მის მიდამოებში ფაცი-ფუცი არა წყნარდებოდა. ეს უცნაური ფაცი-ფუცი კარგს არას მოასწავებდა ჩვენთვისაო, ბრძანებს ისტორიკოსი. შამილს ახალ-ახალი რაზმები, მოსდიოდა საჩაჩნოდან და რგოლივით გარს ევლებოდნენ ხაფანგში მომწყვდეულ რუსის მხედრობას.

დიდის ხნით გაჩერება გადამწვარსა და გადაბუჯულ დარგოში შეუძლებელი იყო, რადგან სურსათი სრულგებით გამოვლიათ რუსებს, ადგილობრივ კიდევ არაფრის მოხერხება შეიძლებოდა. უკან დაბრუნება ანდიით, იმ ტყის გზით, სადაც ექვს ივლისს ფიცხელი ბრძოლა გამოიარეს რუსებმა, უხერხული იყო, რადგან ამ გზით სიარული დამარცხებულის გაქცევას ემგვანებოდა. მეტი ჯანი არ იყო, ისევ წინ უნდა წასულიყვნენ და აერჩიათ ს. გერზელის გზა, რომლითაც დაბრუნდა 1842 წელს ძალზე დამარცხებული გენერალი გრაბზე.

გრაფ ვარანცოვმა გერზელის გზა აირჩაი და გადასწყვიტა ამ გზით შინ დაბრუნება, მაგრამ ვიდრე ჯარი აიყრებოდა და შინისაკენ პირს იბრუნებდა, საჭირო იყო დარგოში დარჩენა ჩამდენიმე დღით, სანამ ანდიიდან სურსათს მოაშველებდნენ.

10 ივლისს 1845 წელს გამოჩნდა ანდიის მხრიდან სასურველი ტრანსპორტი სურსათით. ტრანსპორტს თან ახლდა ძლიერი რაზმი თ. ვ. ბებუთაშვილისა. დიდი გამოცანა არ იყო საჭირო იმისი, რომ შამილი უვნებლად არ გაუშვებდა ბებუთაშვილის რაზმს, ჩაუსაფრდებოდა დარგოს დაბურულ ტყეში და ეცდებოდა სურსათის წართმევას, რომ რუსები შიმშილით გაეწყვიტა. ამის გამო გრაფმა ვარანცოვმა წინ მიაგება მთელის თვისის მხედ-

რობის ნახევარი გენერალ კლიუგენაუს უფროსობით. კლიუგენაუს რაზმის ავანგარდს წინ უძღოდა მამაცი და მთიელებთან ომში გამოცდილი და მეტის-მეტად მხნე გენერალი პასსეკი.

ისტორიკოსი ესაძე ასე აგვიწერს სიტყვა-სიტყვით ამ უბედურს ლაშქრობას გენერალ კლიუგენაუს რაზმისას. რაზმი დაიძრა დილა ადრიან და შეჰყო თუ არა თავი დაბურულ ტყეში, კანტი-კუნტად გაისმა თოფის სროლის ხმა. მოწინავე ბატალიონი მიდიოდა წინ, მაინც და მაინც დიდ დაბრკოლებას არავინ უჩენდა. აქა-იქ თუ შეეხეჩებოდა ხოლმე მტრის პატარ-პატარა ჯგუფებს, თოფის სროლით იგერიებდა და გზას ისე იკვალავდა. ბატალიონი მიაღწა ვიწრო, პატარა ბილიკს, რომელიც აერთებდა ორ დიდ ხევს. პასსეკს ეგონა, ალბად ბილიკი ჩახერგილი იქნებოა, მაგრამ ჩახერგისა არაფერი ეტყობოდა იქაურობას.

გენერალი პასსეკი ხმალ-ამოღებული მიუძღოდა წინ თავის ბატალიონს და „ურას“ ძახილით გადიქრა ხევის მეორე ნაპირზე. საოცარი ის იყო, რომ მთიელებმა მარტო ორჯერ-სამჯერ თუ ესროლეს თოფი პასსეკის რაზმს, იმის მაგიერ რომ ესარგებლნათ ვიწრო ბილიკით და სეტყვასავით დაეყარათ ტყვია-წამალი.

ომში გამოცდილ პასსეკს გულმა კვნესა დაუწყო. ხის ტოტების ლაწა-ლუწი ისმის, თოფის სროლა კი არ ისმისო. მთიელები დიდის ოსტატობით სარგებლობენ ხოლმე მუდამ ეამს მოხერხებულის ადგილ-მდებარეობით, თავს ესხმიან რუსებს, — და ახლა რა დაემართათო, ჰფიქრობდა თავის გუნებაში პასსეკი. განა ამისთანა მოხერხებულ მდებარეობას თავზე დასასხმელად, როგორიცაა ეს ვიწრო გადასავალი, ხიდსავით გადებული ორ ხეებს შუა, ბევრს იპოვნიან შამილის მხედარ-მეომარნი?

ყველაფერი მალე გამოირკვა, შამილმა განგებ მისცა პასსეკს საშუალება უბრძოლველად გადასულიყო ხევის მეორე ნაპირზე. რაკი პასსეკი გადიტყუა მეორე ნაპირას, შამილი მთელის თავისის ძალ-ღონით თავს დაე-

ცა გენერალ ვიქტოროვის უკანა რაზმს. როდისაც გენერალ ვიქტოროვის, არიერგარდი გაება ქაობიან და მოლიპულ ხევის ფერდობებში და როდესაც საცალოებ აკედებული ჩალვადრის ცხენები წეროებსავეთ გაიქინენ. სწორედ მაშინ მიწის მგლენსავეთ გამოხტენ ჩასაფრებული მთიელნი და მიესივენ ყოველის მხრიდან. ხმლითა და ხანჯლით დაუწყეს ღუპასავეთ კეპვა მოულოდნელობისაგან ელდა ნაკრავ რუსებს. ენით გამოუთქმელი და კალმით აუწერელი ხელჩართული ბრძოლა გაიმართა. ამბობს ისტორიკოსი. გაჭკრა დანდობა და შეწყალება. გაბოროტებულმა და გაათრებულმა მთიელმა ზედ დანთხია თვისი ნაღველი გონება-დაბნეულ რუსის მხედრობას და თითქმის სავსებით გასწყვიტა ვიქტოროვის არიერგარდი. მოჰკლეს გენერალი ვიქტოროვი, პოლკოვნიკი კრივოშენი. ცოცხალნი ვერც დანარჩენი აფიცრები გადაარჩინენ. სურსათის მისაღებად გამზადებული ცხენები საცალოებით შამილმა წაასხა.

თვალთ მნახველი ამ საშინელ ხოცვა-ჟლეტისა მილიციონერი, თუში ღეთისავერ ცისკარაშვილი, პაპა ლევან ცისკარაშვილისა, ცოტა სხვანაირად უამბობდა თურმე რუსების გაჟლეტის ამბავს მეზობლებს, თავისიანებს, შვილებსა და შვილი-შვილებს. სამწუხაროდ მხოლოდ ის დაგვრჩა, რომ დანამღვილებით ვერ გადმოგვეცეს, გენერალ ვიქტოროვის შეეხება ცისკარაშვილის მოთხრობა, თუ პასეს.

აი რას მოუთხრობდა მოხუცი, ათას ქირს გამოვლილი მილიციონერი ღეთისავერ შთამომავლობას: რუსის ჯარი, ხიშტებ-გაშვერილი და „ურას“ ძახილით შეიქრა ერთს ფიჩხითა, ხის ტოტებით და კუნძებით ჩახერგილადგილშიო. საიდგანდაც ხერგიანს ადგილს ცეცხლი გაუჩნდა, საშინლად იფეთქა რაღაცამ და ალი აეარდაო. კვამლსა და ჯანყში გაეხვია ჯარი, გაშტერდა და ადგილიდან ველარ დაიძრა, ვერც წინ მიდიოდა და ველარც უკან დაიხია. გაშვერილი ხიშტები ხელში მაგრად ეჭირათ და ძირს დაღებას ველარ ახერხებდნენო. ეტყობა ნა-

მილს ფიჩხისა და კუნძების ქვეშ თოფის წამალი ბლომად დაეწყო და სწორედ ამ წამალმა იფეთქა, ცხელი ტყვია რომ მოხვდაო.

გაშეშეული, ხიშტებ წინ გაწვდილი ჯარი კარგა ხანს იყო გაჩერებული ერთ ალაგას და ბოლოს მორთო გულშემზარავი საქონლისებური ბლავილიო. სწორედ ამ დროს მისცივდნენ ლეკები და დაუწყეს ჩეხა ხმლითა და ხანჯლებითაო.

გენერალი რომ დავინახე სხვებსავეთ გაშტერებული, მივევარდი და ხმა მალლა მოვახსენე—რას გაჩერებულხართ, გაეცალეთ ამ ჯოჯოხეთსაო. რადგან გენერალი არ იძროდა, ვსტაცე ხელი და წამოვიყვანე ძალით, მავრამ უკან გამობრუნებულს ტყვია მოხვდა და ხელში მომიკლესო.

სწორედ იმ დროს, როდესაც ჩახერგილმა ადგილმა იფეთქა და გაშტერებული ჯარი ბლაოდა, ჰახლობელ მთის სერზე გამოჩნდა თვით შამილ თეთრ უმტკერო დოლბანდით მობურვილი. გძელ ლეჩაქს დოლბანდისას ნიავე არხვედა და უცნაურ სურათს აძლევდა ახოვან ტანის პატრონს შამილსაო. ახალგაზდა ქალთა გუნდნი გარს ეხვია იმამს და საამურ სიმღერებს ამბობდნენო. ქალთა სიმღერა ვაჟკაცობას უორკეცებდა მთიელებს, ჰმატებდა გულადობას და ისეთის თავგამოდებით იბრძოდნენ, რომ მე ბევრის მნახველს ამის მზგავსი არა მინახავს რაო *).

ღვთისაგარ ცისკარაშვილის მოთხრობა მეტად საყურადღებო და თან საოცარია. უბრალო მომაკვდავი, უბრალო კაცის შთამომავალი რომ ყოფილიყო შამილ, იმისთანა საარაკო სამხედრო ხერხს ვერ მიმართავდა, როგორსაც მიმართა შამილმა ჯარის კაცთა გასამხნეებლად. ამ გვარი ხერხი და ოინი ხვედრია დიდ ბუნებო-

*) ეს ამბავი გადმოგვცა ივ. ბუქურაულმა.—თუშეთი საყვავა ასეთის საგმირო ამბებით. ურიგოს არ იზამენ ჩვენი წასწაველი მთიულნი, რომ ჩასწერდნენ ამგვარ ამბებს და გაამდიდრებდნენ ქართულ მოთხრობითს ლიტერატურას.

ვან სარდლისა, დიდის ქუა-გონების ადამიანისა და აღმინისტრატორისა. უბრალო მთიელი, უბრალო ჯარისკაცი, თვით საზაგალითო და შეუდარებელი გეომარცხი რომ იყვეს, ვერ ჩაიდენს იმას, რაც მოიქმედა შანილში 10 ივლისს 1845 წელს დარგოს ბრძოლაში. აშკარად სჩანს, რომ შამილის სისხლი ნარევეა. მის ძარღვებში აღბად სჩქედდა სისხლი ისეთი მამისა, ვისი წინაპარნი, ან თვითონ მამა ჩვეულნი იყვნენ ქვეყნის ბატონობას და გამგეობას.

მოწინავე რაზმის უფროსმა გენერალ პასსეკმა ვიკტოროვის რაზმის გაწყვეტის ამბავი გაიგო სიკვდილს გადაარჩენილ ჯარისკაცებისაგან. რაკი საქმეს აღარა ეშვებოდა რა, პასსეკი თავის გზას დაადგა და გასწია თ. ბებუთაშვილისაკენ.

სალამოს, პასსეკი რომ დაბანაკდა და ცეცხლი გაააჩინეს ჯარისკაცებმა, აქეთ-იქიდან გულშემზარავი ხმა მოისმოდა: „კურინელებო, ყაბარდოელებო, ნავაგელეებო, ქართველებო, აქ, აქეთ ზოდით!“ გზა-დაბნეული ვიკტოროვის რაზმის სალდათები თურმე ბნელაში დაყიანდნენ და ამხანაგებს ეძებდნენ. რუსები რომ ამ ცეცხლში იყვნენ, მთიელები მხიარულობდნენ გამარჯვებას, თოფებს აცლიდნენ, მღეროდნენ და ხმა მალდა. ლოცვებს ამბობდნენ. ახალ-ახალ ხერგებსაც ბლომად აკეთებდნენ. გათენებამდის ცულების კაკა-კუკი არ შეწყვეტილა.

მეორე დღეს პასსეკმა რის ვაივაგლახით შეადგინა სურსათისა და საშხედრო მასალის ტრანსპორტი და გაემართა დარგოსაკენ. წინა რაზმის უფროსობა ისევ თვითონ იკისრა, ხოლო არიერგარდი ჩააბარა პოლკოვნიკ რონჩევსკის.

ჟოქიანი ხეობა, სადაც ვიკტოროვის რაზმი გასწყვიტა შამილმა. სავსე იყო გახრწნილი გვამებით. ელდა ეცა პასსეკს და მის რაზმს ეს საშინელი სურათი რომ იხილეს. მიადგა თუ არა პასსეკი ამ საბედისწერო ჟოქიანს, უცბად იგრიალა თოფებმა და ხელობა დაიწყო ხოცვა,

ულეტა რუსებისა. მამაცი პასსეკი ქორივით შეიჭრა ბრძოლაში, იქ, სადაც რუსები მატლსავეთ ისრისებოდნენ, მაგრამ ტყვიამ გაუგშირა გული და პირალმა დაეცა დედამიწაზე. მოჰკლეს აგრედვე პოლკოვნიკი რონჟევსკი და მომეტებული ნაწილი აფიცრობა. თვით პასსეკის გვამი უკვალოდ დაიკარგა. თურმე ჯარის-კაცნი ღამ-ღამე დადიოდნენ ჯგუფ-ჯგუფად გვამის საძებნელად, მაგრამ ამაოდ. ტყუილ-უბრალოდ საცოდავნი სიცოცხლეს სწირავდნენ და საქმეს კი ვერას შევლოდნენ. საყვარელ აარდლის გვამი ვერ იპოვნეს.

დადგა საშინელი, კრიტიკული წამი რუსებისათვის. შამილს შეეძლო სავსებით გაეწყვიტა რუსის მხედრობა და თვით მთავარსარდალი გოაფი ვარანცოვი ტყვედ წაეყვანა. ასეთს გაჭირვებაში რომ ჩავარდა ვარანცოვი, მისწერა მარცხენა ფრთის უფროსს გენერალ ფრეიტაგს— შეჰკრიბე ჯარი და გამოეშურე საშველადაო. ეს ბრძანება ხუთის სხვა და სხვა გზით გაუგზავნა ფრეიტაგს, რა არის, ერთ-ერთი შიკრიკი მაინც გადარჩება ცოცხალი და ფრეიტაგთან უვნებელი მივაო. თ. ბებუთაშვილს-კი შეატყობინეს— დაბრუნდი თემირხანშურაში და თან წაიყვანე რაც ანდიასა და გუმბეთში ჯარია გაბნეულიო.

დილის 4 საათს, 13 ივლისს გრაფი ვარანცოვი დაიძრა შინისაკენ. რომ უფრო სუბუქად ევლო ჯარს, გრაფმა ბრძანა— მძიმე არა წამოიღოთ რა თან და ყველაფერი გააფუქეთო. პირველი მაგალითი თვითონ მისცა ჯარს და დააწვევინა მთელი თვისი ძვირფასი ბარგი.

14 ივლისს რაზმი მიადგა სოფელ შუანისს. შამილმა წინ უყულა რუსებს, მაგარი პოზიცია დაიჭირა გურდალის მთა-გრეხილზე და შეუქრა გზა. რუსების გასაფლელი გზა ხერგებით აავსო შამილმა და მათი აღება უკანასკნელ ძალას უღვევდა რუსის მხედრობას. მოწინავე რაზმს უფროსობდა მელლერ-ზაკომელსკი და გრაფი ბენკენდორფი.

რაზმი მიიწევდა წინ ვიწრო ბილიკით დიდის გაჭირვებით. გზა-გზა მტერი მოსვენებას არ აძლევდა და სეტ-

უვასავით ტყვიას აყრიდა. ამას გარდა დიდად უჭირვებდა საქმეს აუარებელ დაქრილ-დაკოდილთა პატრონობა და საკაცებით ტარება. ხელს უშლიდა აგრედვე ათის ზარბაზნის თრევა, რომლებითაც ველარ სარგებლობდნენ. რადგან ყუმბარები დიდი ხანია გამოლეული იყო.

ჯარი თოვლსავით დნებოდა და იტანჯებოდა შიმშილით და ავადმყოფობით. აფიცრობა ილეოდა. დაიქრა წმინედ ბენკენდორფი; კრილობა მიიღეს ნავაგინის პოლკის კამანდირმა პოლკოვნიკ ბიბიკოვმა, პოლკოვნიკ ზავალიევსკიმ, მილიციის აფიცრმა თ. ერისთავმა, საგენერალო შტაბის აფიცრებმა: შტაბს-კაპიტნებმა: გრაფ გეიდენმა და ბარონ დელევიგმა; პორუჩიკმა ლონჯინოვმა და გრაფ დე-ბალმენმა.

ჯარის-კაცნი ისე დაოსდნენ, რომ მოძრაობის თავი აღარა ჰქონდათ და დედა-მიწაზე ცვიოდნენ პანტასავით. ადიუტანტმა მოახსენა ვარანცოვს, ჯარს მოძრაობა აღარ შეუძლიანო. ბევრს ეცადნენ ლიდერაი, გურკო და ბელიავსკი, მაგრამ ველარა გააწყესრაო.

ჯარის უფროსებმა თათბირი მოახდინეს და გადასწყვიტეს, რადაც უნდა დაგვიჯდეს, სარდალი უნდა გადავარჩინოთ ცოცხალი და უშიშარ ადგილს გავიყვანოთო.

ადიუტანტმა რომ მოახსენა გრაფ ვარანცოვს ასეთი გადაწყვეტილება ჯარის უფროსებისა, სარდალმა გულდამწეიდებით უპასუხა: უბედურება ჯერ შორსაა... ჩამოუარა მიწაზე გართხმულ სალდათებს და გაამხნევა სიტყვით. ტკბილ სალამის შემდეგ ვარანცოვმა იძრო ქარქაშიდგან ოსმალური კაუჭა ხმალი და გაჰქანდა ხერგებისაკენ. ამის დანახვაზე იხუვლა ჯარმა და უკან ვაჰყვა საყვარელ სარდალს, რომელიც ჯართან ერთად იტანდა ათასგვარ გაჭირვებას. გამხნელება და აღფრთოვანება ისეთი ძლიერი იყო, რომ ასე გასინჯეთ მედუქნე-მარკიტანტები და ჩადვადრებიც კი გამოეკიდნენ უკან ჯარს და წინ გაუსწრეს ვარანცოვს. გამხნეებულმა ჯარმა იერიშით აიღო ხერგი, მტერს დაატლევინა პოზიცია,

მაგრამ გრაფმა ვარანცოვმა ისიც კარგად დაინახა, რომ ეს უკანასკნელი აფეთქება იყო სიმბნევე-მამაცობისა. ამიტომ სარდალმა გადასწყვიტა ფეხი აღარ მოეცვალა ადგილიდან, ვიდრე ფრეიტაგი არ მოვიდოდა.

გულის გასაკეთებლად ჯარს ასეთი ბრძანებით მიმართა გრაფ ვარანცოვმა: „ყველანი ვხედავთ, თუ რა გაჭირვებაში ჩავარდა ჩვენი რაზმი. გარს ვვახვევია გამარჯვებით აღფრთოვანებული უთვალავი მტერი. დაქრილ-დაკოდილთა რიცხვი 1500 კაცს აღემატება. სასმელსაქმელი აღარ მოგვეპოვება. ყუმბარები თითქმის აღარ დაგვრჩა. შეუძლებელი გახდა წინ წასვლა. შეიძლება გაუსხლტეს მტერს ღამის წყვდიადში მცირეოდენი რიცხვი ჩვენებისა და საშვილობოში გავიდეს. მაგრამ მაშინ თავი უნდა დაფანებოთ და ღვთის ანაბარად დავსტოვოთ დაქრილ-დაკოდილი ჩვენი ამხანაგები. რალა თქმა უნდა. ჩვენთაგანი ვერაფერს იკისრებს ჩაიღინოს ასეთი შეუწყნარებელი ცოდვა. მე ხომ ფიქრადაც არ მომივა ჩაიღინო ასეთი ცოდვა.“

საქმე არც ისე ცუდათაა, რომ ყველაფერი დაკარგულად ჩაითვალოს. კაცები გაუუგზავნე გენერალ ფრეიტაგს და ვაცნობე ჩვენი გაჭირვება. ყველას მოეხსენება, რა სარისტიანი გენერალია ფრეიტაგი. დარწმუნებული ვარ, რომ გენერალი ფრეიტაგი დაგვიხსნის გაჭირვებისაგან. მაგრამ თუ გვიწერია ბედისაგან სიკვდილი, დავიხლოცნეთ როგორც შეჭფერის რუსებს. მტერს რომ არაფერი ერგოს ჩვენის ქონებიდან, კარები და საცვლები ნაპრებად ვაქციოთ ქრილობათა შესახვევად, ხოლო დანარჩენი ქონება გავანადგუროთო“.

ერთად ერთი იმედი ფრეიტაგი-ლა იყო, ამბობდა თურმე გრაფი ვარანცოვი, შემდეგში რომ იგონებდა დარგოს ლაშქრობას. მე ჩემი თავი არ მენანებოდა. სირცხვილიცაა ჩემს ხანში და ჩემს ხელობაში სიცოცხლეზე ზრუნვა, მაგრამ გულს მიკლავდა დაკოდილთა მწარე ბედით.

გრაფ ვარანცოვის ბანაკი სოფელ შაუხალ-ბერდის

ფერდობებს აეკრა. მდინარეს მეორე ნაპირს შამილის პანაკი იყო და იქიდან სამის ზარბაზნიდან ყუმბარებს ატარდა შამილ რუსების ერთ ადგილს და ისეთს გაჰკირვებდას ითმენდნენ, რომ სამი კაცი ერთად ვერ იკრიბებოდა შამილის ყუმბარების შიშით. თვით ვარანცოვის კარავი თვალსაჩინო ადგილს იყო დადგმული და თუმცა აფიქრობა ემუდარებოდა, ნება მოგვეცით სხვა უშიშარ ადგილს დავდგათ თქვენი კარავიო, მაგრამ გრაფი არ უბუღლდებოდა. დამშვიდებით წვებოდა მოსაკვეც ლოგინზე და კითხულობდა ახლად მიღებულ ინგლისურ გაზეთებს^{*)} და სრულებით, ყურს არ აქცევდა, რომ შამილს ადვილად შეეძლო ნიშანში ამოეღო მისი კარავი და მიეღწენოლეწა.

18 ივლისს, საღამოს 5 საათზე, სანიშნო შუშხუნანმ შეატყობინა ვარანცოვის რაზმს, რომ „მხსნელი“ ახლომახლოა.

მეორე დღეს, 19 ივლისს, გენერალი ფრეიტაგი გაემართა ს. შაუხალ-ბერდისკენ, ხოლო აქედან ვარანცოვი აიყარა და ფრეიტაგისკენ გასწია. ერთი ორჯელსამჯერ ესროლეს რუსებს მთიელებმა და მერმე თავი დაანებეს და გაიფანტნენ. როდესაც ჯარები შევერდნენ, გრაფმა ვარანცოვმა შესძახა თავის რაზმს: მოახსენეთ „ურა“ თქვენს მხსნელსა და სიცოცხლის მომნიჭებელსაო.

20 ივლისს გრაფ ვარანცოვის რაზმი დაბრუნდა ს. გერზელს, სადაც აღარაფერი შიში აღარ მოელოდათ.

ასე უბედურად გათავდა დარგოს ლაშქრობა, სადაც რუსებმა დაჰკარგეს 3031 ჯარის კაცი.

*) გრაფი ვარანცოვი რუსის ლონდონელ ელჩის შვილი იყო და ზედ-მიწევნით იცოდა ინგლისური ენა და ინგლისური ლიტერატურა. ოდესში ყოფნის დროს, პუშკინის ლექსები რომ წაიკითხა, ასე დაახასიათა ვარსკვლავი რუსის პოეზიისა: უხეირო მიმბაძავია ბაირონისაო.

დარგოს ექსპედიციამ კეუა ასწავლა რუსებს და ამ დღიდან ხელი აიღეს დიდის რაზმებით შესვლაზე შუაგულ საჩაჩნოში და დაღესტანში და დაიწყეს ნაპირებზე სტანიციების მოწყობა, ტყეების გაჩეხა და ნელ-ნელა წინსვლა. ახალმა ტაქტიკამ სული შეუღუთა მთას და, როგორც ზემოთ მოგახსენეთ, უკანასკნელად ბაწრის წვერი მოსწია თ. ბარიათინსკიმ 25 აგვისტოს 1859 წელს გუნბის მთაზე და მთის არწივი შამილი გალიაში გამოამწყვდია.

დარგოს ლაშქრობისათვის გრაფ ვარანცოვს უწყალობა იმპერატორმა ნიკოლოზ პირველმა თავადის ღირსება.

ამ მცირე ისტორიულ ამბის უკანასკნელ კარში მკითხველს გაუუზიარებთ ჩვენს მოსაზრებას; რომ მთის ბატონი შამილ, ეს შეუღარებელი იმამი დაღესტნისა, უბრალო ლეკი არ იყო. ჩვენ გვჯერა, რომ შამილის ძარღვებში სჩქედდა ქართველის სისხლი, სისხლი იმ ერისა, რომელიც მიჩვეული იყო ბატონობას და მართვა-გამგეობის უნარიც ბევრჯელ გამოუჩენია სისხლით მორწყულ მრავალ-კარიან თავის ისტორიაში.

V

ვისი შვილი იყო შამილ?

საქართველოს ტახტის მაძიებელი ბატონიშვილი ალექსანდრე ირაკლის ძე იქნებოდა ასე 28—30 წლისა, შამილ რომ დაიბადა ს. გიმრაში.

დაუძინებელი მტერი რუსის მთავრობისა ბატონიშვილი ალექსანდრე არწივივით თავს დასტრიალებდა და ამბოხების კიაკოკონას ამზადებდა. მოუსვენარი ტახტის მაძიებელი ხან ერევნის სახანოში ამოჰყოფდა თავსა, ხან თვით სპარსეთში, ხან დაღესტანსა და ლეკეთში, ხან ახალციხის საფაშოში. ყველგან, საცა-კი გაჩნდებოდა რუსეთის მოძულე ბატონიშვილი, სასურველი და სანეტარო სტუმარი იყო. მისი სტუმრობა და შფოთის ატეხა რუსის მართვა-გამგეობის წინააღმდეგ ერთი და იგივე

იყო, ასე ვსთქვათ სინონიმი. ეტყობა, ან ქართველი კაცის სახელს, ან ბატონიშვილ ალექსანდრეს რაღაც უცნაური, მიმზიდველი და ანდამატური ძალა ჰქონია. ამ დღეებში (1904 წელს) რუსის სამსახურის პოლკოვნიკ, ანწუხელ ლეკმა ღიმილითა და თავმოწონებით ნიანშო ბატონიშვილი ალექსანდრე დალესტანს რომ ამოვიდოდა ხოლმე, ჩვენს ოჯახში თურმე დასდებდა ბინასაო. კარგად მახსოვს, — ბავშვობა-სიყმაწვილეში ზღაპარსავეთ მიამბობდნენ, თუ სად ისვენებდა და რომელ ოთახში იძინებდაო. დრო და ეკმა თავისი გაიტანა. ალექსანდრეს ნადგომი ოთახები დაინგრა სიძველისა გამო. დაიფიქრა იმ ორი ხის ყუთიც, სადაც ბატონიშვილის ნივთები ელავაო. ეს კი ლამაზად მახსოვს, რომ დიდის მოწიწებით და სიყვარულით ინახავდნენ ჩვენს ოჯახში ამ უბრალო ყუთებსა და უფრთხილდებოდნენ ნიშნად პატავისცემისა ძვირფასის სტუმრის ნაქონარ ნივთებსაო.*)

აქ მოკვანილი ამონაწერი ნათლად გვიჩვენებს, რომ ბატონიშვილი ალექსანდრე ხშირი სტუმარი ყოფილა დალესტანისა.

მაშასადამე სრულიადაც არ უნდა გაგვიკვირდეს. რომ ახალგაზდა ბატონიშვილს, ჯანითა და ღონით სავსეს, ოცდა რვა, ან ოცდა ათის წლის უცოლშვილო ქაბუკს კავშირი ჰქონოდეს რომელსაჲმე ლეკის ქალთან და შედეგად ასეთის ღრობით კავშირისა გასჩენოდეს შვილი დალესტანში.

ჩვენი მთა თურმე დღესაც სავსეა სხვა და სხვა თქმულებით ალექსანდრე ბატონიშვილზე. ერთი ასეთი თქმულება საკუთარის ხელით დაგვიწერა სახელოვანმა პოეტმა ვაჟა-ფშაველამ. ეს თქმულება შეეხება ალექსანდრეს რომანიულ შემთხვევას დალესტანში და პირდაპირ ამტკიცებს, რომ ალექსანდრეს დალესტანში შვილი ეყოლაო. აი თვით ეს ფშაური თქმულებაც. „პირველად,

*) იხ. ა. ფრონელის მონოგრაფია: „ამბობება კახეთისა“, გვ. 66 — 67.

როცა ბატონიშვილი ალექსანდრე გაიქცა და მტრობა გამოუცხადა რუსის მოაფრობას, მიჰმართა მთას. ბატონიშვილს ყველგან უნდოდა მომხრეები ეშოვნა. ამ მიზნის მისაღწევად დაღესტანშიაც-კი იმყოფებოდა. ფშავისა ხომ ხშირი სტუმარი იყო, სადაც ნათლიედდები და ნათლი-მამები გაიჩინა. უამისოდაც ზოგიერთ ოჯახებთან ძლიერ დაახლოვებული იყო ბატონიშვილი. ერთი ამისთანა ოჯახი ხახა ქისტაურისა იყო, სადაც ერთხელ ქეიფობის დროს ბატონიშვილმა წარმოსთქვა თურმე: „ეჰ. მე იქნება ამოდენა ტანტალში უძეოდ მოვკვდე. თუშკაც კი არც უძეო ვარ, მხოლოდ ის მენანება, რომ ჩემი თესლი დაღესტანში დარჩაო“.

ამ გვარი ხასიათის თქმულება სხვაც ბევრი დარჩენილა მთაში. ქართველ მთიელებში დღესაც ამჰობენ, რომ დედა რომ გაუწყებოდა შამილს, მომეზრებულნი მისის ცელქობით და ანცობით, წააყვედრებდა ხოლმე: არ დაცხრები, შე გიაურო და გურჯის შეილოვო!

იმის გამოსარკვევად თუ ვისი შვილი იყო მთის არწივი შამილ, უბრალო ავარელ ლეკისა, თუ ალექსანდრე ბატონიშვილისა, საინტერესო მასალას გვაძლევს ერთი ხელთნაწერი, რომელიც გადმოგვცა კაპიტანმა ს. მ. ასათიანმა. სამწუხაროდ არა სჩანს—ვის შეუდგენია ეს ხელთნაწერი, ან როდისაა დაწერილი. არც კაპიტან ასათიანს ახსოვს, თუ როგორ ჩაუვარდა ხელში ეს საყურადღებო დოკუმენტი.

დოკუმენტი შეიცავს ექვს ფურცელს. პირველი ფურცელი ცარიელია, ზედ არაფერი სწერია, ხოლო მარტო მეორე ფურცლის პირველი კაბადონია საესე ნაწერით. დანარჩენი ფურცელნი პირველისავით ცარიელია. ფურცელში ჩადებული ყოფილა რაღაც მცენარის დიდი ღოთოლი და მისი კვალი ატყვია ცარიელ ფურცლებს. უკანასკნელ ფურცლებზე რუსულად და ერთი სიტყვა ქართულად აწერია: „Въ Закатальскомъ округѣ въ с. Гюлюкѣ есть Кошшъ—гора—на ней церковъ, а на большой горѣ есть дворець Тамары; у подно“

жыя горы есть равнина Джори ჯორი.

კაპიტანი ასათიანის სიტყვით, ეს საყურადღებო ხელთნაწერი აღმოჩენილა შემთხვევით „ქართლის — კავ-
რებაში“.

აი თვით სიტყვა-სიტყვით თვით ხელთნაწერი. „ვა-
გონილი კიზლიარსა და მოზდოკში სომხებიდამ და და-
ლისტანში კი ზოგიერთი მოხუცებული ლეკებიდან.“

როდესაც ალექსანდრე ბატონიშვილმა ძე ერეკლე მეფე მეორისა იყო დევნილი რუსთაგან, მაშინ იგი გარ-
დაიხვეწა დალისტანში, ავარში, სოფელს სოკოლოს, *) რომელიც არის ს. გიმრის მახლობლათ. აქ განდევნი-
ლობის ეამში ალექსანდრემ, როგორც უკულო ასაკო-
ვანმა ვაჟაკმა შეიყვარა რომელიმე ლეკის საშუალობით
ერთი ლეკის, სახელად დენგაუს ცოლი. ქალი ლამაზი
და მათ შეერთებიდგან დაიბადა შამილი, რომელიც გა-
ნითქვა შემდეგ დალისტანის იმამათ და შეიქმნა ძლიერ
განთქმული რუსების მტერი. თვით დენგაუ იყო კაცი
ძრვილ ლალი და სუსტი კკუის. ხელობა იმისი იყო მხო-
ლოდ წყლის ზიდვა საკიდრით მდინარედგან და არა მე-
ტი ხელობა მას არ შეეძლო. მცხოვრები იყო ს. გიმ-
რის. და როგორც ამბობენ არ შესძლებოდა მას სისუს-
ტისა გამო შესრულება ცოლქმობის წესისა.

P. S. ამასვე ამტკიცებს თავის წერილებში თანამედ-
როვე შამილისა დოკტორი კობახიძე, რომელიც იყო
მოზდოკელი ქართველი, სიმავერი თავად შაქრო დ. ხერ-
ხეულიძისა“.

მოზდოკის და ყიზლარის სომხობას კარგად ეცო-
დინებოდა შამილის შთამომავლობა, რადგან შამილ მათი
სიძე იყო. რაღა თქმა უნდა რომ იმისთანა დიდებულ
სიძის ამბავს, როგორიც იყო შამილ, დაწვრილებით
გამოიძიებდნენ და გამოიკვლევდნენ სომხები. ულუხანო-

*) ესლანდელ ავარიის ოლქში არის სოფელი სახელად გო-
ზოლო-კოლო, სადაც ითვლება 40 კომლი ავარელი. ცხადია, რომ
ეს სოფელია დოკუმენტში მოხსენებული სოკოლო.

ვის ქალი ანა, როგორც ამ ისტორიულ ამბავში იყო მოხსენებული, გახდა საყვარელი მეუღლე შამილისა და რა საკვირველია, რომ საყვარელ მეუღლეს შეეტყო შთამომავლობა თავის ქმრისა. ანას შემწეობით კიდევ შამილის დაბადების საიდუმლო ძრიელ ადვილად გაიბნეოდა კიზლარისა და მოზდოკის სომხობაში.

ზემოდ მოყვანილ დოკუმენტში დასახელებული დოქტორი კობახიძე, მოზდოკელი ქართველი, რომელსაც ცალკე წერილები ჰქონია შამილის შესახებ, თავის დროს ცნობილი კაცი ყოფილა. არა გვეგონია, რომ ეს განათლებული ადამიანი ბავშვურად მოჰყვარებოდა შამილის ჩამომავლობის ამბავს და ზღაპარი სინამდვილედ აღიარებინა. ურიგოს არ იზამენ, თუ მისი მემკვიდრენი და შთამომავალნი გამოაქვეყნებენ მის წერილებს, ან და გადასცემენ საქართველოს ისტორიის და ეთნოგრაფიის საზოგადოებას, სადაც შენახული იქნება ბ-ნ ასათიანის დოკუმენტიც.

გადაჭრით და კატეგორიულად ძნელია იმის დამტკიცება, რომ შამილ შეიღია ბატონიშვილ ალექსანდრესი, მაგრამ თანახმად ყველა იმისა, რაც ამ ისტორიულ ამბავში ნათქვამია, ძრიელი საბუთი გვეძლევა ვნახვათ, რომ იმამი დალისტნისა, მთის არწივი შამილ იყო-შვილი შამით ბატონიშვილ ალექსანდრესი. თითო სახის მეტყველება ორთავესი, შამილისა და ალექსანდრესი, მეტის-მეტად წააგავს ერთმანეთს. მაღალი, ანოვანი ტანი, შექმუხნული შუბლი. დარდი და ვარამი, რომელიც საოცრადაა აღბეჭდილი ორივეს სახეზე ამტკიცებს მათს სიახლოვეს და ნათესაობას. ტუჩ მოკუმულ სახეს ბატონიშვილისას რომ აკვირდები, ჰფიქრობ რომ ამ ადამიანს ერთი ბედნიერი დღე არ უნახავს თვის ხანგრძლივ სიცოცხლეშიო. ასეთსავე შთაბეჭდილებას ახდენს დაღვრეპილი და დარდიანი სახე შამილისა.

დაწვრილებით შესწავლა და გამოძიება სამშობლო ისტორიისა და დალისტნისა უეჭველია სავსე ნათელს მოჰყენს შამილის ჩამომავლობის საიდუმლოსაც.

პასუხისმგებელი გამოცემისათვის **ს. დოღრიძე**
გამოცემის ტექნიკური ხელმძღვანელი **გ. თოიძე**

გადაეცა წარმოებას 31. 10. 1990
ჭალალის ზომა 60+84/16

შეკეთა № 10
ტირაჟი 10 000

ფასი 2—00

გამომცემლობა „ხელოვნება“

თბილისი, დავით აღმაშენებლის გამზირი 179

1990

აბრეჯირიპროექტთან არსებული კოოპერატივი

„სინათლე“ -90-